

Romanos

Pablo Roma majaräre Jesu yaräre gojabeoñumi

1 ¹Yũhũ Pablo mũare Roma majaräre gojabeoa. Yũhũ Jesucristo pohro majagu āhraa. Eropigu ōari buherire buhedoregu apimi ĩgu yũre. ²Iri ōari buherire iribojegue Goãmũ “Ōpa masare ōaro iigũra,” arĩ wereyuñumi ĩgu yare weremuhtanirā merague. Erā irire gojañuma. ³Iri buheri ta ĩgu magũre wereri āhraa. ĩgu Jesucristo masa dehyoagu árĩgu Davi mũru pãrami árĩturiagu árĩdigu árĩmi. ⁴Ĩgu ta Goãmũ magũ ĩgu árĩrĩre ĩhmudigu árĩmi Goãmũ ĩgu Espĩritu Santo mera. Eropigu ĩgu Jesu sĩrira pũhrũ Goãmũ ĩgu turari mera ĩgũre masa mũriacũ iidigu árĩmi. Eropigu Jesucristo diaye ta Goãmũ magũ ĩgu árĩrĩre ĩhmudigu árĩmi masare. ĩgu Goãmũ magũ ta mari Opũ Jesucristo āhrimi. ⁵Ĩgu ta gũare mojomoro ĩagu gũau magũre wereri āhraa. ĩgu Jesucristo masa dehyoagu árĩre ĩgu yare buhedoregu obeomi árĩpehrero majaräre ĩgu yare pee masi, Jesucristore erā umupeocũ iimoräre. ⁶Eropirā mũa sã Jesucristo yarā árĩmorā ĩgu beyenirā āhraa. ⁷Mũare Goãmũ ĩgu mahiräre, ĩgu yarā árĩmoräre iidi árĩmi ĩgu mũare. Eropigu mũare Romague árĩräre ipũre gojabeoa. Eropigu Goãmũ mari Pagũ mari Opũ Jesucristo mera mũare ōadorea. ĩgu itamuri mera ōaro árĩque mũa.

Pablo Romaguere ĩagu wadiarica, arĩ gojañumi

⁸Ire weremuhtagura mũare. Árĩpehrerogueru Jesucristore mũa umupeora querere werema. Erā eropa arĩ werecũ peerā “Ōhaa,” arĩ serēa yũhũ Goãmũre. Jesucristo ĩgu itamuro mera eropa arĩ serēbasaa. ⁹Goãmũre serēgu mũa ya árĩburire árĩpehrerinuri serēbasaniguicãa. Mũa ya árĩburire eropa yũ serēbasaniguicũ Goãmũ masimi. ĩgu dorerire turaro mohmea ĩgu magũ ya buherire buhegu. ¹⁰Eropa serēgu Goērã judio masa árĩbirā Jesure umupeoama. Erā umupeodiro dopa ta mũa mera majarã sã erā umupeoborore mũa pohrogue wadiarabũ yũhũ. Eropa bajasuburi wadiaqueregu ta wamasibirimũrabũ yũhũ. ¹¹Goãmũ yare mũare buhediaca Jesure mũa umupeonemoburire. Eropigu mũare bũrigã ĩadiaca yũhũ. ¹²Jesucristore umupeorã āhraa mari. Eropigu mũare ĩadiaca Jesucristore mari umupeori mera pepũri majarã mari game mucubiricũ iiborore. ¹³Yũ acawererã, ire mũa masicũ gahmea. Gajipũgue ōari buherire yũ

buhera pũhrũ gajirã mũa acawererã judio masa áribirã Jesure umupeoama. Erã umupeodiro dopa ta mũa mera majarã sã erã umupeoborore mũa pohrogue wadiarabũ yũhũ. Eropa bajasuburi wadiaqueregu ta wamasibirimurabũ yũhũ. ¹⁴Árĩpehrerãre õari buherire buhero gahmea yũre. Wũari maca majarãre, noho gamero árirãre, masirãre, masibirã sãre buhebu árigũ iiaa yũhũ. ¹⁵Eropa arĩgu, árigũ mũa sãre Roma majarãre õari buherire burigã buhediaa.

Õari buherire masa peerã Jesure umupeonũgama, arĩ gojañumi Pablo

¹⁶Õari buherire peerã masa Jesure umupeonũgama. Eropigu árĩpehrerãre Jesure umupeorãre Goãmũ ãgu turari mera erã peamegue wabonirãre tuami. ãgũre umupeorã õaro waborore masigũ iri buherire õari buherire buhegu gũhyasiuro taribea. Iri buherire judio masapũre buhemũtanirã árima. Pũhrũ judio masa áribirã sãre gũa buheabũ. ¹⁷Iri buheri õpa werea: Jesucristore umupeiorãre “Ñeri marirã õarã áhrima,” arĩ ãhami Goãmũ. Jesucristore umupeorã dihtare eropa arĩ ãhami Goãmũ. ãgu eropa arĩ ãarire iribojegue erã arĩ gojadiro dopa ta arãa: ““Õarã áhrima,” arĩ ãgu ãarã Goãmũre ‘Diaye ta ãgu áhrimi,’ arĩ umupeorã áhrima. Eropa umupeorã árĩpehrerinũri Goãmũ mera árirãcoma,” arĩ gojañuma.

Masa erã ñero iiri mera dipuwajacũrã áhrima, arĩ were gojañumi Pablo

¹⁸⁻¹⁹ãgu áriricũrire masare õaro masicũ iipũ Goãmũ. Eropirã ãgũre ãgu áririre masicũ diasabea masare. ãgu áririre masare masicũ iiquerecũ masapũ erã ñerire iirã Goãmũre masidiabeama. Erã iri ñeri iiri mera gajirãre Goãmũ yare peebiricũ iima erãpũ. Eropigu Goãmũ umarogue árigũ masa árĩpehrerã erã ãgũre tarinũgarire, eerã ñero iiri sãre ãagu eerã eropa iiri dipuwaja guami. Eropa ãgu guarire masicũ iimi erãre. ²⁰Goãmũ umaro majagu ãgu áririre turagu ãgu áririre mari ãabiriquerecũ ta, ãgu basi ãgu áririre masicũ iimi ãgu marire. I yebare ãgu iira pũhrũ árĩpehrerire ãgu ãhacũnugurare ãarã, “Goãmũ ãgu iira ta áhraa. ãgu turagu ta áhrimi,” arĩ guñama masa. Eropirã “Goãmũ áhrimi,” arĩ masima masa árĩpehrerã. Eropirã masa “Goãmũ áhrimi,” arĩ masiquererã eropa ñerire iiniguicãrã, dipuwajacũma. “Mũre masibirabũ. Eropigu ñerire iiabũ,” masa arĩmasisome Goãmũre. ²¹Goãmũ ãgu áriricũrire masiquererã ta erã ãgũre umupeobeama. “Mũhũ Goãmũ, turagu ta áhraa,” arĩbeama. Eropirã ãgu erãre õaro iiquerecũ ta “Õhaa,” arĩbeama ãgũre. Eropirã pee masibirã árirã, ñeri dihtare pepima erã. ²²“Pee masirã áhraa,” arĩquererã ta pee masibirã wahama erã. ²³Eropa warã Goãmũre eropa áriniguigũre õagũre umupeobeama. Eropa umupeobirã “Goãmũ áhrimi,” erã arĩrãpũre erã wéanirãpũre umupeonũgama erã. Eropirã masare, mirimagũ porãre, pĩuare, waimũrãre wéanugu umupeoma erã, “Mari Goãmũ áhrimi,” arĩrã.

²⁴Erã eropiicũ ãgu “Erã gamero dopa ta ii curaporo,” arĩgu Goãmũ erãre cohãmi. ãgu eropa cóara pũhrũ, erã ñeri dihtare uaribejarã erã basi ñeri dihtare iiniguicãma. ²⁵Eropirã Goãmũ yare peebiri, gũyaripũre õaro peema. Goãmũ

yapure gɥari iro dopa ta wacū iima erā. “Diaye ta Goāmure árípehrerāre iidigure umupeoro gahmea,” mari aríquerecū erāpū ĩgure umupeobeama. Eropa Goāmū gohrare umupeobirā ĩgū iirapure umupeoma erā.

²⁶Erā eropiinigucācū ĩagu “Erā gamero ñerire ii curaporo,” arĭgū Goāmū cohāmi erāre. Eropirā erā mera majarā nome marapɥcūrā nome iro dopa árĭbeama. Eropirā erā nome seyaro ñero iima erā basi. ²⁷Erā iro dopa ta árĭrā ũma sā nomere gamebirā erā basi ta erā dɥpurre ɥaribejarā āhrima. Eropirā erā basi ta erā ñero iira dipuwaja erā dɥpurre ñero goroweoma.

²⁸Eropa Goāmure masidiabirā ĩgure gamebirira dipuwaja Goāmū “Erā gamero ii curaporo,” arĭgū erāre cohāmi. ĩgū eropa cóācū erāpū ñerire guñanigui, ñerire ɥaribejarire iinigucāma. ²⁹Eropirā erā burigā ñero iiniguima. Nome mera ñero iiniguirā, erā ñerire ɥaribejaniguirā, gajirā yare gametarirā, gajirāre ñero iiniguirā, gajirā gajinore opacū ĩhaturirā, masare wejērā, game dɥyasorā, gɥaricūrā, masare ĩhaturirā, ñeri quere iirā āhrima erā. ³⁰Gajirā erā iibiriquerecū ta ñero arĭ werewuarā, Goāmure ĩhaturirā, gajirāre papūro yuhrirā, “Gua tamera gajirāre tarinugarā ōarā āhraa,” arĭ pepirā, gajirāre eropa arĭ weremaacārā, gajĭ ñerire iinugarā, erā pagū sɥmarāre tarinugarā āhrima. ³¹Pee masibirā āhrima. Erā werediro dopa ta iibirā, masare ne umupeobirā, erāre ñero iirare ne cādĭjibirā, ne gajirāre mojomoro ĩabirā āhrima. ³²Eropa árĭrāre Goāmū erāre dipuwaja moa peamegue cóāgucumi ĩgū erāre. Eropa ĩgū cóāburire masiquererā erā ñerire iinigucāma. Eropirā gajirā erāre ĩhacūcū, erā iiro dopa ta ñero iicū ĩarā “Gua iiro dopa ta iima,” arĭ mucubirima.

Masare erā ñero iira dipuwaja moadoregū irire diaye ta iigucumi Goāmū, arĭ were gojañumi Pablo

2 ¹Erā eropa ñerire iicū ĩarā gajirā ōpa arĭbocoma: “Erā ñetariarā āhrima. Goāmū erāre dipuwaja moaporo,” arĭbocoma. Eropa arĭrāre ōpa arĭ werediaca. Mua sā erā iiro dopa ta iiaa. Eropirā “Erā ñetariarā āhrima,” gajirāre arĭ werewuabiricāro gahmea mware. Eropa arĭ wererā mua basi ta erā ñerire iiro dopa ta iirā dipuwajacūrāca. Iri ñerire masiquererā iirā mua ñero dipuwajacūrāca. ²“Goāmū diaye ta dipuwaja moagu āhrimi,” arĭ masia mari. Árĭpehrerāre ñerire iirāre dipuwaja moagucumi. ³Eropĭgū mua ñero iira dipuwaja árĭcū mua sāre dipuwaja moagucumi. “Gajirā dipuwajacūrācoma,” arĭ werewuarā, “Gɥapure dipuwaja moasome,” arĭ pepiboca mua. Árĭbeaa. Mua sāre mua ñero iira pɥhrū dipuwaja moagucumi. ⁴Goāmū mware mojomoro ĩagu mata dipuwaja moabeami. Eropirā “Goāmū yɥ mera guabeami,” arĭ pepiboca mua ñerire iira pɥhrū. Árĭbeaa. Goāmū mware mojomoro ĩagu mata mua ñero iira pɥhrure dipuwaja moabeami. Mua ñero iirire bɥjawerecū ĩadiagu, ĩgure mua yuhricū gamegū mata dipuwaja moabeami. ⁵Eropa mata dipuwaja moabiriqueregū. mua Goāmure peebirinigucācū, mua ñero iirire bɥjawerebiricū ĩagu dipuwaja moagucumi. Mua eropa ñero iiniguirāre ĩgū dipuwaja moarinū árĭcū burigā dipuwaja moagucumi mware Goāmū. Irinure Goāmū masare dipuwaja moacū árĭpehrerā ĩarā “Diaye

ta erã ya dipuwaja àhraa,” arĩ masirãcoma. ⁶Eropigu áripehrerã nũcu erã ñero iira dipuwajare dipuwaja moagũcumi Goãmũ. Eropigu erã õarire iirã sãre õarire erãre oũcumi. ⁷Yujurãyeri õarire iima. Erã õarã árdiara, Goãmũ ïgu gamero dopa iidiaarã Ʃmũri nũcu Goãmũ mera árdiara àhrima. Erã tamerare Ʃmũri nũcu ïgu mera erã áriborore iigũcumi Goãmũ. ⁸Gajirãpu erã iro dopa áribeama. Erã erã gamero iirã árcãma. Diaye majare gamebirã ñerire iiniguirã àhrima. Goãmũ erã mera turaro guagũcumi. ⁹Áripehrerã ñerire iirã ñero tarirãcoma. Judio masare eropa wamũtaroca. Eropirã judio masa áribirã sãre eropa ta waroca. ¹⁰Áripehrerã õarire iirãpuere “Õaro mũa iiaa,” arĩ ïagũcumi Goãmũ. Eropirã erãpu Goãmũ mera õaro mera árirãcoma. Judio masare eropa ta wamũtaroca. Eropiro judio masa áribirã sãre eropa ta waroca.

¹¹Goãmũ mari iirare ïagu queoro beyemi áripehrerãre. Judio masare, judio masa áribirãre Goãmũ yujuropa ïhami marire. ¹²Gajirã Moise dorerire erã mooquerecũ erã ñerire iicũ erãre dipuwaja moagũcumi Goãmũ. Iri doreri oparãpu ñerire erã iicũ erã dorerire erã tarinũgari waja dipuwaja moagũcumi Goãmũ erã sãre. ¹³Moise dorerire peequererã ta yũhibirãre “Õarã àhrima,” arĩbeami Goãmũ. ïgu dorerire iirãpuere “Õarã àhrima,” arĩ ïhami Goãmũ. ¹⁴Judio masa áribirã Moise dorerire mooquererã erã pepiro mera õarire iirã Goãmũ dorerire iirã iima. Eropirã Moise dorerire gojarapũre mooquererã erã, erã pepirigue iri dorerire opama. ¹⁵Eropirã Goãmũ dorerire erã pepirigue diaye opama. Eropa oparã ñerire ii mata erã ñero iirare masima erã basi. Eropigu ñerire iidigu, “¿Duhpigũ ñerire iayuri yũhũ?” arĩ pepimi ïgu. Eropigu õari sãre ïgu iirare masimi ïgu. ¹⁶Eropigu Goãmũ Jesucristore ïgu obeocũ masa erã iirare ïagũcumi. Masa erã iiricũre gajirãre werebirirare erã duhrare Jesucristo masipehogũ ïgu erã iiricũre ïagũcumi. Eropa ta ïha beyegũcumi, arĩ buhea yũhũ ïgu ya õari buherire buhegu.

Goãmũ Moisere ïgu apira dorerire were gojañumi Pablo

¹⁷Mũaru judio masa árirã, Goãmũ Moisere ïgu apira dorerire umupeorã árirã, “Goãmũ yarã àhraa gũa,” arĩ pepiraa mũa. ¹⁸Eropirã Goãmũ dorerire masirã árirã, ïgu gamerire masia mũa. Eropa masirã árirã “Õarire gua iiborore beyemasia,” arĩ pepiraa mũa. ¹⁹Eropa arĩ pepirã õpa arĩ pepinemoa mũa judio masa: “Gajirã ne masibirãre õaro masicũ iiaa gũa. Erãre gũa buhebiricũ ne Goãmũre masibiriboñuma. Eropirã ñerire ne duhubiriboñuma,” arĩ pepiraa mũa. ²⁰Eropirã “Pee masibirãre õarire buhea gua judio masa. Majirãgã sãre buherã àhraa gũa,” arĩ pepiraa mũa. Eropirã “Goãmũ dorerire oparã diaye árirãre masipehoa gũa,” arĩ pepiraa mũa. ²¹¿Mũa eropa arĩ pepirã áriquererã ta duhpirã mũaru mũa buhediro dopa ta iibeari? ¿Gajirãre yajadorebiriquererã duhpirã mũaru yajari? ²²¿Gajigu marapo mera ñero iidorebiriquererã duhpirã mũaru gajigu marapo mera ñero iiri? “Goãmũ àhrimi,” erã arĩ wéanirãre umupeorire doorã áriquererã ¿duhpirã Goãmũ gohrãpuere õaro umupeobeari mũaru? ²³“Goãmũ Moisere ïgu apira dorerire opaa gũaru,” arĩrã áriquererã ta ïgu dorerire tarinũgaa mũa. Eropa

tarinugarã Goãmure erã umupeobiricũ iirã iica mua gajirãre. ²⁴Eropa ta werea Goãmũ yare erã gojarapũgue: “Judio masa árĩbirãpũre ñero Goãmure wereniguicũ iiaa mua judio masapũ,” arĩ gojañuma Goãmũ yare erã gojarapũgue.

²⁵Mua judio masa Goãmũ dorerire iiniguirã árĩrã gasiro merogã wiri aĩsũnirã circuncisión iinirã árĩcũ òapũrica. Īgu dorerire iibiricũ mua judio masa árĩricũri duhpiburi árĩbeaa. ²⁶Eropiro judio masa árĩbirã merogã gasirogãre wiri aĩsũbirinirã erã árĩquerecũ ta Goãmũ dorerire erã iirã árĩcũ ĩagu, “Yaharã masa ta àhrima,” arĩ ĩabocumi Goãmũ erãre. Judio masapũre ĩgu eropa arĩ ĩadiro dopa ta judio masa árĩbirã sãre eropa ta arĩ ĩabocumi. ²⁷Bajarã judio masa Goãmũ yare gojarapũre Moise dorerire opaquererã irire iibeama erã. Eropirã gajirã judio masa árĩbirãpũ Moise dorerire opabiriquererã gasiro merogã wiri aĩsũbirinirã árĩquerera Goãmũ dorero dopa ta iima. Eropa iirã árĩrã judio masare erã ñero iirire masicũ iirã iima. ²⁸“Gũa judio masa Goãmũ yarã àhraa,” arĩ pepiraa mua. Eropĩgu Goãmũ yagu gohra árĩgũre weregũra mũare. Īgu dũpũpũre merogã gasirogãre wiri aĩsũdigũ árĩqueregũ ta Goãmũre umupeobigũ árĩgũ diaye ta Goãmũ yagu árĩbeami. Judio masũ gohra árĩbeami. ²⁹Espĩritu Santore opagũpũ, ĩgũre yũhřigũ ĩgu ta judio masũ gohra Goãmũ yagu gohra àhrimi. Eropirã Goãmũ yarã gasiro merogã wiri aĩsũnirã dilta árĩbeama. Erã Espĩritu Santo mera erã pepirĩgue òari mera gohrotorã àhrima Goãmũ yarã. Eropa árĩrãre “Òarã àhrima,” arĩ ĩhami Goãmũ. Masa erãre eropa arĩ ĩabiriquerecũ ta eropa arĩ ĩhami Goãmũpũ erãre.

3 ¹Yũ eropa arĩquerecũ judio masa erã árĩricũri, gasiro merogã wiri aĩsũnirã erã árĩri òapũricãa. ²Judio masa erã árĩri yuju diaye gohra árĩbeaa. Goãmũ ĩgu wereniguiri judio masare were apimũhtatuhañumi. Erã ĩgu yare erã gojarapũre opamũhtañuma. Eropirã judio masa erã árĩcũ òapũricãa erãre. ³Eropirã bajarã judio masa Goãmũre erã peebiriquerecũ ta ĩgu werera diaye ta àhraa. Eropĩgu ĩgu arĩ werediropã dopa ta iigũcumi ĩgu. ⁴Eropa ta àhraa. Árĩpehrerã masa erã gũyaricũrã erã árĩquerecũ ta Goãmũpũ ne gũyabeami. Īgu yare gojarapũgue eropa ta arĩ gojara àhraa: Diaye ta eropa ta arĩ wereniguigũ àhraa mũhũ Goãmũ. Eropirã masa mũre ne weresãmasibeama, arĩ gojañuma iribojegũere.

⁵Masa erã pepiri mera òpa arĩ pepimaacãbocoma: “Mari ñeri iiri árĩcũ, Goãmũ ĩgu òari iiripũ deserea. Eropiro mari ñeri iiri mera Goãmũ ĩgu òaro iiri deserecũ ĩgu marire mari ñeri iiri dipuwaja moagu queoro iibeami,” arĩ pepimaacãbocoma. ⁶Eropa árĩbeaa. Mari ñeri iirapũ òari árĩcũ Goãmũ mari ñeri iira waja dipuwaja moamasibiriboañumi.

⁷Masapũ gũyaricũrã àhrima. Goãmũpũ ne gũyari marigũ àhrimi. Gũyari marigũ ĩgu árĩcũ òaro masia mari. Eropirã masa yujurãyeri òpa arĩ pepirima: “Gũa gũyari mera Goãmũ ĩgu diaye árĩripũ deserea. Eropiro gũa gũyaripũ òha àhraa. ¿Eropiro gũa gũyari òacũ duhpigũ gũa gũyari waja dipuwaja moabocuri guare Goãmũ?” arĩ pepimaacãma yujurãyeri erã basi. ⁸Eropirã òpa arĩ gũyama yujurãyeri guare: “Mari ñerire iiri mera Goãmũ ĩgu òagu árĩripũ deserea. Eropirã ñerire iiro gahmea,” arĩma. “Pablo sã

eropa ta arĩ buhemi,” arĩ gũya weresãma erã guare. Erã eropa arĩ gũyari dipuwaja Goãmũ erãre dipuwaja moagucumi. Eropa ta iiporo erãre.

Árĩpehrerã ñeri iira dipuwajacurã áhraa mari, arĩ gojañumi Pablo

⁹¿Eropirã dohpa pepiri mua? ¿Mari judio masa gajirã tauro òarã árĩcuri? Árĩbeaa mari. Judio masa, judio masa árĩbirã sã árĩpehrerã dipuwajacurã áhraa mari. Eropa ta áhraa yũ árĩpehrerãre arĩ buhediro dopa ta. ¹⁰Eropa ta arĩ gojara áhraa Goãmũ yare erã gojarapũgue sã. Òpa arĩ gojañuma:

Ne yujugũ masũ òagũ marimi. ¹¹Mari árĩpehrerã masa peediabirã dihta áhraa. Eropirã árĩpehrerã mari masa Goãmũre ne guñabeaa. ¹²Eropirã mari Goãmũ yare gamebirã árĩpehrerã ñerire iirã áhraa. Ne yujugũ òarire iigũ marimi. ¹³Mari wereniguiiri, ñeri dihta wiria mari disirore. Bũrigã gũyaricua. Eropa wereniguirã aña gũcurire igũ pũriri wiuro dopa ta pũriro mera wereniguiwiua mari. ¹⁴Eropirã mari gajirãre ñero wereniguirã, papũro wereniguirã áhraa. ¹⁵Eropirã mata guarã masare mata wejẽa mari. ¹⁶Eropirã noho mari waro, masare ñero ii, ñero taricũ iiaa mari gajirãre. ¹⁷Eropirã gajirã masa mera òaro árĩbeaa mari. ¹⁸Eropirã Goãmũre ne umupeobea, arĩ gojamũriñuma iribojegure mari masare.

¹⁹⁻²⁰Eropirã òpa masia mari: “Mari masa ñerã áhraa,” eropa arĩ gojarã judio masa sãre Moise doreri iirã sãre arĩ wereniguimũriñuma. Eropirã árĩpehrerã mari judio masa sã “Gua tamera ñeri dipuwaja mara guare,” arĩmasibea. Goãmũ doreripũre mari masa ne iibea. Eropirã iri dorerire iibirã Goãmũ mera òamasibea mari. Igũ dipuwaja moamorã áhraa. Eropiro mari ñerã árĩrĩre igũ doreripũ masicũ iiaa marire. Iri dorerire masirã “Gua iiricuri ñeri áhraa,” arĩ masia.

Jesucristore òaro umupeocũ Goãmũ marire “Òarã áhrima,” arĩ ìhami, arĩ gojañumi Pablo

²¹Dohpaguere Jesucristore umupeorãre “Dipuwaja moorã, òarã áhrima,” arĩ ìhami Goãmũ pare. Igũ eropa arĩ ìaborore Goãmũ yare weremũhtanirã Moise sã weremũhtañuma. Eropigũ masare erã ñero iira wajare igũ taurare weremi marire Goãmũ. Moise dorerire mari iira mera mari ñerire taubeami. Òpa áhraa: ²²Árĩpehrerã Jesucristore umupeorãre, igũ yare peerãre, “Òarã áhrima,” arĩ ìhami Goãmũ. Erã ñero iira dipuwajare taumi. Eropa iigũ árĩpehrerãre yujuropa òaro iimi. ²³Mari masa árĩpehrerã ñerire iirã áhraa. Eropirã Goãmũ igũ gamero dopa ne iibea mari. ²⁴Mari eropa iiquerecũ Goãmũ árĩpehrerã masare igũmojomoro ìadigũ árĩmi. Eropigũ Jesucristo mari masa ñeri iirare wajayebasadi árĩmi. Igũ eropa iira pũhrũ “Dipuwaja moorã áhrima,” arĩ ìhami Goãmũ Jesure umupeorãre. Waja gamero mariro mari ñerire cohãmi. ²⁵Iribojegue majarã erã ñero iirare ìagũ Goãmũ mata dipuwaja moabiriñumi erãre. Igũ eropa dipuwaja moabigũ erã ñero iirare bu gohra pepicãgu iibiriñumi. Eropigũ erã ñerire cãdijibu igũ Jesucristore obeodigu árĩmi árĩpehrerã masa erã ñeri dipuwajare sãribasabure igũ di cõabure. Eropigũ mari masa Jesucristore umupeocũ Goãmũ mari ñeri

iirare cãdijigucumi. Eropa iigu “İgu diaye iigu àhrimi,” marire arĩ masicũ iidi árími. ²⁶İgu magure obeodigu árími dohpague majarã sã erã ñeri iira dipuwajare wajayebasabure. Eropiidigu árími “İgu òaro diaye iigu àhrimi,” mari masa arĩ masiborore. Jesure umupeorãre “Òarã àhrima,” iigu arĩ iaborore eropiidi árími.

²⁷Eropirã dohpaguere mari ejatuharo “Òarã àhraa mari,” ne arĩmasibea mari. “Moise dorerire iirã òarã àhraa,” iri sãre arĩmasibea mari. Òpa arĩmasia mari: “Diaye ta yu ñerire iigu cohãmi,” mari Jesucristore arĩ umupeocũ, “Òarã àhrima,” arĩ iagucumi marire Goãmũpũ,” arĩmasia mari. ²⁸Òpa masia mari: Moise dorerire mari iiquerecũ, iri mera “Òarã àhrima,” Goãmũ arĩ iabeami marire. Jesucristore mari umupeocũ iagu marire “Òarã àhrima,” arĩ ihami iigu.

²⁹Goãmũ judio masa opu dihta áríbeami. Judio masa áríbirã opu sã àhrimi. ³⁰Eropa árigũ Goãmũ yujugũ ta árigũ, árípehrerã wecague opu àhrimi. Eropa árigũ judio masa Jesure erã umupeocũ, “Erã dipuwaja moorã àhrima,” arĩ iagucumi. Eropigu judio masa áríbirã sãre Jesure erã umupeocũ, erã sãre “Dipuwaja moorã àhrima,” arĩ iagucumi Goãmũ. ³¹¿Eropirã Jesucristore umupeoturã Goãmũ Moiserẽ iigu dorerire cóarã iibocuri mari? Irire cóãbea mari. Jesure umupeorã tamera Goãmũ dorerire diaye ta iirã iiaa mari.

Abrahã Goãmũre iigu umupeorare were gojañumi Pablo

4 ¹Mari ñecu árímhãtadigu Abrahã Goãmũre “Diaye iigu àhrimi,” arĩ umupeomuriñumi iigu sã. İgu eropa umupeori mera òañumi Goãmũ mera. ²Abrahã òaro iigu iiquerecũ “Òagu àhrimi,” arĩ ianibirimuriñumi Goãmũ iğure. İgu Goãmũre umupeocũ tamerare “Òagu àhrimi,” arĩ iamuriñumi iğure. Eropigu iigu ejatuharo òarire iiqueregu ta ñegu árinigu “Yu tamera òagu àhraa,” arĩmasibiriñumi Abrahã Goãmũ iigu iacũ. ³Goãmũ yare gojarapũ òpa àhraa: “Abrahã Goãmũ iğure arĩrare òaro iigu peecũ, iğure iigu umupeocũ iha Goãmũ iğure ‘Òagu ñeri iira dipuwaja moogu àhrimi iigu,’ arĩ iañumi iğure,” arĩ gojara àhraa. ⁴Òpa àhraa: Mari masare yuju diaye wajayebeama. Mari òaro mohmera waja marire wajayema. Goãmũpũ eropa iibeami. ⁵Mari gamero òarire iiro mariro mari Jesucristore umupeocũ iha marire yuju diaye iigu òarire ocãmi. Eropigu marire “Òarã àhrima,” arĩ ihami marire Jesucristore umupeorãre. Ñerire iinirãre erã ñeri iira dipuwaja maricũ iigu àhrimi. Eropirã masa Jesucristore umupeocũ iagu “Dipuwaja moorã àhrima,” arĩ ihami Goãmũ erãre. ⁶Masa erã gamero mera òaro iirare Goãmũ iabeami. Erã iğure umupeocũ tamerare ihami. İğure umupeorãre “Òarã àhrima,” arĩ ihami. İgu eropa arĩ iadigũpũ iigu mucubirire òpa arĩ gojañumi Davi mũpũ iribojegue majagu:

⁷Erã ñerire iigu cãdijinirã tauro mucubirima.

⁸“Òarã àhrima. Erã ñero iirare guñasome yũhũ,” arĩmi Goãmũ erãre. Eropirã burigã mucubirima, arĩ gojañumi Davi.

⁹Judio masare merogã gasirogãre wiri aĩsũnirã dihtare erã ñero iirare cãdijibeami Goãmũ. Judio masa áríbirã sãre erã ñero iirare cãdijimi iigu. Dipaturi

Abrahãre guñaque mña. Īgu Goãmure umupeocũ ĩagu ĩgu ñero iirare cãdiji, “Ōagu ãhrimi,” arĩñumi Goãmũ. ¹⁰¿Dohpáricũ eropa arĩyuri Goãmũ Abrahãre mña pepicũ? Īgu merogã gasirogãre ĩgu wiri aĩboro coregue ta ĩgure “Ōagu ãhrimi,” arĩ ĩañumi Goãmũ. Eropigu gasirogãre wiri aĩgu ĩgu ñerire cóatuhadigugue wiri aĩñumi. ¹¹Eropigu gasiro merogã wiri aĩboro coregue Goãmure umupeonũgatuhañumi Abrahã. Īgu eropa umupeocũ “Ōagu ãhrimi,” arĩ ĩañumi Goãmũ ĩgure. Eropa ĩgu umupeorire, ĩgu yagu ĩgu áririre ĩhmudoregu Goãmũ ĩgu dũpũre merogã gasirore wiri aĩdoreñumi. Eropigu Abrahã ĩgu gasirogã wiri aĩboro core Goãmũpũ “Ōagu ãhrimi,” arĩ ĩatuhañumi ĩgure. Eropigu Abrahã Goãmure “Diaye ta iigu ãhrimi,” ĩgu arĩ umupeodiro dopa ta áripehrerã Goãmure eropa arĩ umupeorãre “Ōarã ãhrima,” arĩ ĩhami Goãmũ. Eropigu judio masa áribirãre gasirogã wiri aĩsũya marirã sãre “Ōarã ãhrima,” arĩ ĩhami Goãmũ. Eropirã erã Abrahã pãramerã iro dopa ta dujama. ¹²Erã iro dopa ta judio masa sã gasirogã wiri aĩsũnirã sã, Goãmure erã umupeorã árirã Abrahã pãramerã diaye ta ãhrima. Īgu gasirogã wiri aĩboro coregue, Goãmure umupeo ĩgu mera ñañumi. Eropirã ĩgu umupeodiro dopa Goãmure umupeorã ñaro ãhrima Goãmũ mera.

**Goãmũ Abrahãre ĩgu werepira diaye ta áricũ
masiñume Abrahã, arĩ gojañumi Pablo**

¹³Iribojegue ñpa arĩñumi Goãmũ Abrahãre: “I yebare mure, mũ pãramerã árituriarã sãre ogũca,” arĩ werepiñumi Goãmũ Abrahãre. Moise dorerire Abrahã ñaro iira waja eropa arĩbiriñumi Goãmũ ĩgure. Abrahãpũ Goãmure “Diaye ta iigu ãhrimi,” arĩ umupeora pũhrũ eropa arĩ werepiñumi. Īgu eropa arĩ umupeocũ ĩagu Goãmũ ĩgure “Ōagu ãhrimi,” arĩ ĩañumi. ¹⁴Goãmũ oburire Moise dorerire iirã dihta aĩbeama. Erã dihta aĩcũ mari Goãmure umupeori ñehe áriburi áribiriboya maripũre. Eropiro Goãmũ ĩgure umupeorãre “Mũare ogũca,” ĩgu arĩ werepira duhpiburi áribiriboya. ¹⁵Goãmũ Moiserẽ ĩgu apira dorerire iirã bocatiubeaa mari. Īgu dorerire mari pee tarinũgara waja, dipuwaja moasũmorã ãhraa mari. Iri doreri maricũ tamera ĩgu dorerire tarinũgaro mariboya.

¹⁶Eropirã Goãmure umupeorã dihta ĩgu oburire aĩrãcoma. Abrahã Goãmure “Diaye ta iigu ãhrimi,” arĩ umupeomuriñumi. Eropirã áripehrerã Abrahã Goãmure umupeodiro dopa ta umupeorã ĩgu pãramerã iro dopa dujama. Eropigu “Ire mure mũ pãramerã sãre ogũca,” Goãmũ Abrahãre arĩgu áripehrerãre ĩgure umupeorãre arĩgu iĩñumi. Eropirã Moise dorerire iirã dihta Goãmũ ĩgu oburire aĩsome. Áripehrerã Abrahã iidiro dopa Goãmure umupeorã erã ĩgu oburire waja mariro aĩrãcoma. ¹⁷Irire Abrahãre ĩgu arĩdiro dopa ta arĩ gojañuma iribojeguerẽ: “Baja yebari majarã ñecũ áribu apibũ mure, arĩ, apipũ Goãmũ Abrahãre,” arĩ gojañuma iribojegue ta. Eropigu ĩgu Goãmure “Diaye ta iigu ãhrimi,” arĩ umupeomuriñumi. Īgu

eropa umupeocũ Goãmure umupeorã ñecũ iĩñumi Goãmũ ìgure. Goãmũpũ s̄rĩnirãre masugũ, áripehrerire ìhacũnugudigũ àhrimi.

¹⁸ “Baja macari majarã mũ pãramerã árituriarã árirãcoma,” arĩmũriĩñumi Goãmũ Abrahãre. Goãmũ ìgũ eroparĩcũ Abrahãpũ porã marigũ áriquerẽgũ, “Diaye ta àhraa,” arĩ pepimũriĩñumi. ¹⁹ Eropigũ cien bojori opagũ áriquerẽgũ, ìgũ marapo sã buru ne porã marigo áriquerẽcũ, “Porãcũsome gũa,” arĩ ne pepibiriĩñumi Abrahã. Eropigũ Goãmũ ìgure arĩ werepira “Diaye ta àhraa,” arĩ pepiĩñumi Abrahã. ²⁰ “Goãmũ ìgũ arĩdiro dopa ta ne iisome,” arĩ ne pepibiriĩñumi Abrahã. Eropigũ ìgũ Goãmũ ìgure werepirare òaro peeĩñumi. Ìgũ eropa arĩrare peenijagũ, “Goãmũ turagũ àhrimi,” arĩ umupeogũ iĩñumi. Eropigũ Goãmũre “Diaye ta iigũ àhrimi,” arĩ umupeonemoĩñumi ìgũ. ²¹ “Goãmũ ìgũ arĩdiro dopa ta òaro iigũcumi,” arĩ pepi òaro masiĩñumi Abrahã. ²² Ìgũ eropa masicũ, Goãmũre ìgũ umupeocũ ìha Goãmũpũ “Dipuwaja moogũ àhrimi,” arĩ ìaĩñumi Abrahãre. Eropã ta arĩ gojañuma Goãmũ yare erã gojarapũgue.

²³ Abrahã Goãmũre ìgũ umupeora pũhrũ Goãmũ òaro ìaĩñumi ìgure, arĩ gojañuma. Eropã gojarã “Mũa sãre Goãmũre umupeorãre òaro ìagũcumi,” arĩ mari sãre gojajuĩñuma. ²⁴ Irire mari masiburire gojañuma. Eropigũ Goãmũre “Diaye ta iigũ àhrimi,” mari arĩ umupeocũ “Dipuwaja moorã àhrima,” arĩ ìagũcumi Goãmũ mari sãre. Ìgũ tamera mari Opũ Jesu ìgũ s̄rĩcũ masudigũ àhrimi. ²⁵ Jesupũ mari ñeri iira dipuwaja s̄rĩdigũ árĩmi. Ìgũ s̄rĩra pũhrũ masa mũriadigũ árĩmi ìgũ Goãmũ marire “Dipuwaja moorã, òarã àhrima,” arĩ ìgũ marire ìaburire.

**“Dipuwaja moorã àhrima,” Goãmũ ìgũ arĩ ìacũ òpa
waroca marire, arĩ gojañumi Pablo**

5 ¹ Jesucristore mari umupeoturacũ ìagũ “Dipuwaja moorã, òarã àhrima,” arĩ ìhami Goãmũ marire. Ìgũ eropa arĩ ìacũ Goãmũ mera mari òaro árĩcũ iimi marire mari Opũ Jesucristo. ² Eropirã mari ìgure umupeocũ ìagũ Goãmũ marire mahigũ, marire aĩmi ìgũ mera mari òaro árĩboro dopa. Goãmũ tamera òatariagũ àhrimi. Eropigũ ìgũ iro dopa ta òarã árĩcũ iigũcumi ìgũ marire. Ìgũ eropiiburire òaro masia mari. Eropirã mucubiria. ³ Eropirã ñero tariquererã mucubiria mari. Ñero tarirã irire yujuro bojemasia mari. Eropã yujuro bojerã ñero tariquererã òaro Goãmũre guñaturarã wahaa mari. Eropirã Goãmũ yare duhubeaa mari. ⁴ Mari eropa árĩcũ ìagũ, “Òaro iiabũ mũa,” arĩgũcumi Goãmũ marire. Ìgũ marire eroparĩcũ, marire ìgũ tauborore òaro masia mari. Eropirã ñero tarirã sã mucubirimasia mari. ⁵ Eropigũ Goãmũ marire Espĩritu Santore obeomi mari mera árĩdoregũ. Eropigũ Espĩritu Santopũ mari mera árĩgũ Goãmũ marire eropa mahinigucãrĩre masicũ iimi. Eropirã “Goãmũ òaro taugũcumi marire,” arĩ “Ìgũ mera árĩnigucãrãca,” arĩ masia mari.

⁶Eropigu ero core mari ñeri iirare mari basi mari cóãmasibiricũ ïagu, ïgu queodiro sihajacũ mari ñerã ářıra dipuwaja Cristo sřiripu. ⁷Mari masa gajigu ya ářiburire sřibasadiabeaa. Őagu ářigure yujugu sřibasabocumi gajisuba ařigu. ⁸Maripu ñerã mari ářiquerecũ Jesucristo sřibasadi ářimi mari ya ářiburire. ïgu eropiicũ Goãmu turaro marire ïgu mahirare masia mari. ⁹Mari ya ářiburire ïgu sřicũ, ïgu di cóãcũ, Goãmuru marire “Dipuwaja moorã áhřima,” arĩ ïhami. ïgu eropa arĩ ïara puhrũ dohpaguepũre marire peamegue wabonirãre taumi Jesucristo. Eropigu ïgu yarã marire ïgu iira puhrũ marire dipuwaja moasome Goãmu. ¹⁰Eropirã Goãmũre gamebirã mari ářiquerecũ ta ïgu magũ sřirigu mari ñeri iira dipuwaja wajayebasadigu ářimi. Eropa wajayebasagu ïgu Pagũre Goãmũre guabiricũ iimi ïgu mari mera. Eropirã ïgu yarã wahaa mari. Dohpague tamerare tauro ôaro iigucumi marire. ïgu yarã mari ářicũ, Jesu ïgu masa mũriara mera marire peamegue wabonirãre ôaro taugucumi ïgu. ¹¹Pũhrũgue mari tariborore mucubiria mari. Goãmũpũre guña mucubiria. Mari Opũ Jesucristo mari ñeri dipuwaja ïgu sřira puhrũ Goãmũ yarã áhřaa mari. Eropirã mucubiria.

Adãre Cristo sãre wereñumi Pablo Roma majarãre

¹²Jesucristo taunirã ářirã ôpa masia mari: Adãn ïgu ñerire iinũgarasubugue i yebare ñeri ářinũgayoro. Ñeri ářinũgacũ masa sřinũgañuma. Mari ářipehrerã ñerire iiaa. Eropirã ářipehrerã mari ñerã ářiri waja sřirirãca. ¹³Goãmũ ïgu dorerire Moiserẽ apiboro core diaye ta i yeba majarã ñerire iimũriñuma. Eropa ñerire iiquerecũ iri doreri maricũ ïgu doreri tarinũgari waja dipuwaja moamasibiriñumi dohpa. ¹⁴ïgu eropa dipuwaja moamasibiriquerecũ ta Adãnpũ ïgu puhrũ ářirã iri doreri mariquerecũ ta sřimũriñuma. Moise ïgu ářiboro core iri doreri mariquerecũ ta masa sřimũriñuma. Gajirã ñerire iirã Adãn ïgu ñero iimũridiro dopa gohra iibirimũriñuma. Eropiibiriquererã erã sã sřimũriñuma. Eropigu Adãn ñerire iinũgadigu ářinũmi i yebare. Yoara puhrũgue i yeba arigu Jesucristopũ ôarire iinũgadigu ářimi.

¹⁵Adãn ïgu iira Jesucristo iira dopa ářibeaa. Adãn yujugu ta ïgu ñeri iira dipuwaja bajarã masa sřinũgañuma. Goãmũpũ marire mahigu Jesucristore obeodigu ářimi. Eropigu Jesucristopũ ïgu yujugu ta mari ya ářiburire sřibasagu mari bajarã ïgu yarã Goãmũ mera mũmũ nũcũ ářinũguiborore iidi ářimi. ¹⁶Eropigu Goãmũ masare ïgu mojomoro ïadiro Adãn ïgu Goãmũre tarinũgadiro dopa ářibeaa. Adãnpũ ïgu yujugu ta ñerire ïgu iira dipuwaja ářipehrerã masa dipuwaja opama. Erã eropa dipuwaja opaquerecũ, masa wũaro erã ñerire iiquerecũ dohpaguere masare mojomoro ïagu Goãmũ erã ñerire cohãmi. Eropa cóãgu “Dipuwaja moorã, ôarã áhřima,” arĩ ïhami ïgu Jesucristo sřira mera. ¹⁷Adãn yujugu ta ïgu dipuwaja mera ta ářipehrerã masa sřimorã dihta wañuma. Goãmũ ïgu iirañepũ ôataria. Dohpaguere masare mojomoro ïagu Jesucristo ïgu yujugu sřira mera iri ñeri dipuwaja cóãgu marire “Ôarã áhřima,” arĩ ïhami. Eropirã ářipehrerã ïgu eropa arĩ ïanirã ïgu mera ôaro ářinũguicãrãcoma.

¹⁸Yujugu Adán ĩgu ñerire iinugacũ árĩpehrerã ñerire iinugañuma. Erã eropiicũ ĩagu Goãmũ erãre “Dipuwajacurã àhrima,” arĩ ãaũumi. Gajigu Jesupu ĩgu òarire ĩgu iicũ masa erã ñeri iira dipuwaja sĩribasacũ, árĩpehrerã mari ñeri dipuwaja cóadigu árĩmi Goãmũ. Mari ñerire ĩgu cóãnirã árĩcũ “Òarã àhrima,” arĩ ĩagucumi Goãmũ marire. Eropirã árĩpehrerĩnũri ĩgu mera árĩniguicãrãca mari. ¹⁹Yujugu Adán Goãmũre tarinuga nugañumi. ĩgu eropiicũ bajarã masa ñerire iiricurã wañuma. Jesucristopũ Goãmũ ĩgu dorediro dopa iipũ. ĩgu eropiicũ bajarã masa ĩgu ñerire cóãnirã warãcoma. Erã eropa wacũ “Òarã àhrima,” arĩ ĩagucumi Goãmũ erãre. ²⁰Goãmũ ĩgu dorerire Moiserẽ apĩũumi árĩpehrerã masa erã ñero iirare erã masiburire. Mari masa burigã ñerire mari iiquerecũ Goãmũrũ marire burigã mahimi. Eropa mahigu Jesucristo sĩrira mera mari ñerire cóadigu árĩmi. ²¹Ero core mari árĩpehrerã mari ñeri iira dipuwaja sĩrimorã árĩmũriřibũ. Goãmũ marire turaro mahigu mari Opũ Jesucristore ĩgu obeocũ ĩgu marire ñeri dipuwaja marirã wacũ iimi dohpaguere. Eropirã erã “Dipuwaja moorã àhrima,” Goãmũ ĩgu marire arĩ ĩacũ mari árĩpehrerĩnũri ĩgu mera eropa árĩniguicãrãca.

Cristo yarã ñerire iiniguibeama, arĩ gojañumi Pablo

6 ¹¿Goãmũ eropa marire mahicũ ĩarã dohpa iirãcuri mari mũa pepicũ? ¿Goãmũre marire mahicũ iinemediarã ñerire iinemorãcuri mari? ²Árĩbeaa. Ñerire iibiricãrã mari. Jesucristo marire sĩribasadi árĩmi mari ñerire cóãgu. Eropirã Cristo yarã árĩrã marire ñerire iibiricãro gahmea. ³Eropa ta Jesucristo yarã mari árĩrĩre masa erã ĩha masĩborore deco mera waĩyesũbũ. Jesu mari ñeri iira dipuwaja sĩridigu árĩmi. Eropirã ĩgu yarã árĩrã, waĩyesũnirã árĩrã mari ñeri iirare duhucãbũ. ⁴Mari waĩyeri òpa ĩhmua: Jesucristo sĩrira mera mari ñerã árĩdiro pehrea. Eropa wacũ mari Pagũ ĩgu turari mera Jesucristo sĩridire masudiro dopa iri turari mera marire òaripũre gohrotomi. Eropirã òarire iirã wahaa.

⁵Eropirã Cristo yarã árĩrã Cristo sĩrira mera mari ñerã árĩdiro pehrea. Eropirã mari ñeri iirare duhua mari. Eropirã Cristo yarã árĩrã ĩgu masa mũriara mera òaripũre gohrotorã àhraa mari. Iri diaye ta àhraa. ⁶Jesucristo crusague sĩrigũ mari ñerã árĩrãre pehrecũ iidi árĩmi. Mari ñeri ùaribejarire duhumasicũ iidi árĩmi dipaturi mari ñerire iibiriboro dopa. ⁷Mari ñeri ùaribejarare cóãnirã árĩrã ñerire iiniguirã árĩsome pare mari. Irire mari masia. ⁸Eropirã mari gohrotonirã árĩrã mari Jesucristo mera òarire iinugarã árĩrãca. “Iri diaye ta àhraa,” arĩ pepia mari. ⁹Ire mari masia: Cristo ĩgu sĩri, masa mũriara pũhrũ dipaturi sĩrisome. ĩgu sĩribodirore tarituhadigu árĩmi. ¹⁰Eropigu Cristo yujusubu sĩrigũ, masa ñerire cóãgu sĩrimi. ĩgu masa mũriadigu dohpaguere Goãmũ gamerire iigu àhrimi. ¹¹“ĩgu iidiro dopa ta yũ sã àhraa,” arĩ pepique mũa: “Jesucristo mari ñerire cóãdiro dopa ta mari sã mari ñerire cohãa. Ñerire iibirã Jesu yarã árĩrã Goãmũ gamerire iimorã árĩrã tiiaa mari,” arĩ pepique mũa sã.

¹²Eropirã ñeri iiniguirã árĩbiricãque. Eropirã ñerire ùaribejabiricãque. ¹³Ñerire iirã árĩbiricãque. Mũa peamegue wabonirãre Jesucristo ĩgu taunirã àhraa. ĩgu eropa iinirã árĩrã òpa arĩque Goãmũre: “Mũhũ, yũ Opũ àhraa.

Eropigu yũhu mu gamero dopa iigu, mu dorerire iiniguicãgũca mũmuri mũcu pare,” arĩque Goãmũre. Eropirã òarire iirã Goãmũ iigu gameri dihtare iirã arĩque mũa. ¹⁴Dohpagueere Goãmũ mera òaro árĩborore Moise doreri mũare dorebeaa. Jesucristo mũa ya árĩburire sĩribasara mera Goãmũ mera òarã àhraa. Eropiro mũa ñeripu mũare dorebeaa pare. Eropirã ñerire iiniguisme pare mũa.

Mũa ñerire iiniguicũ iri ñeri mũa opu iro dopa àhraa, arĩ gojañumi Pablo

¹⁵¿Yũ eroparĩcũ dohpa arĩ pepiri mũa? ¿Jesucristo yarã árĩrã, Moise dorerire umupeobirimorã árĩrã, ñerire iiniguibocuri mari? Ñerire iiniguibiricãrã. ¹⁶Mũare doregu mũa opu àhrimi. Eropirã iigu pohro majarã àhraa mũa. Eropa ta ñerire iiniguirã mũa árĩcũ iri ñeri mũa opu iro dopa àhraa. Eropirã ñerire duhumasiya mara mũare. Eropirã peamegue wamorã àhraa mũa eropa iirã. Goãmũre òaro yũhrirã árĩrã tamera iigu pohro majarã àhraa. Eropirã iigu yarã òarire iirã àhraa mũa. Irire masia. ¹⁷Iribojegue ñerire iiniguirã mũa árĩcũ, iri ñeri mũare doremũriyoro. Dohpaguepũre òari buherire peerã, Jesure umupeorã, Goãmũ dorerire òaro iirã wahabu mũa. Eropa árĩrã Goãmũre “Òhaa,” arĩro gahmea. ¹⁸Eropa warã dohpagueere ñerire doresũrã árĩbeaa mũa. Eropirã Goãmũ doresũrã árĩrã òarire iiaa. ¹⁹Irire mũare òpa arĩ gojaa mũa òaro peeoro dopa. Iribojegue ñerire iipehorã, ñerire iiniguicãrã mũa árĩdiro dopa ta dohpaguepũre òarire iiniguicãrã arĩque mũa. Eropirã Goãmũ gameri dihtare iirãca mũa.

²⁰Iribojegue ñeri dihtare iirã árĩrã, òaripũre iibirimũriyoro mũa. ²¹Irisubure ñerire iira waja òarire bocabiriyoro mũa. Iri mũa ñeri iirare guñarã dohpagueere guhyasĩrica mũa. Iri ñerire mũa iira dipuwaja peamegue wabonirã árĩribũ. ²²Dohpaguepũre Jesucristo mũare ñeri doresũnirãre wiucãmi pare. Eropirã Goãmũ dorerire iirã wahabu mũa. Eropirã Goãmũ gameri dihtare iirã árĩrãca. Eropirã árĩpehrerinũri Goãmũ mera árĩrãca. ²³Ñerire mari iira dipuwaja peamegue wabonirã àhraa mari masa árĩpehrerã. Mari eropa árĩquerecũ Goãmũpu mari Opu Jesucristore mari umupeocũ iagu, árĩpehrerinũri iigu mera árĩcũ iigucumi. Waja mariro marire eropa iigucumi.

Moise dorerire were gojanemoñumi Pablo

7 ¹Yũ acawererã, Goãmũ Moisere iigu dorerare òaro masia mũa. Masũre iri doreri iigu ojocaribusu dorea. Igu sĩrira pũhrũ iigũre dorebeaa iri. Iri sãre masia mũa. ²Òpa àhraa: Nomeore igo marapu mera dihta árĩdorea Moise iigu doreripu. Iri eropa dorequerecũ ta igo marapu sĩrira pũhrũ igopũ gajigu mera marapũcũmasimo. Eropa ta arĩ werea iri doreri. ³Eropigo igo marapu árĩquerecũ ta gajigũre marapũcũgo, ñero iigo iimo igoa. Igo marapu iigu sĩrira pũhrũgue ta gajigũre marapũcũgo, Moise dorerire tarinũgabeamo igo. Eropigo ñero iigo iibeamo igo.

⁴Eropa ta mũa sã yũ acawererã, Jesucristo sĩrira mera Jesu yarã warã, iri doreri iiri mera Goãmũ yarã wabeaa mũa. Eropirã sĩrinirã mũrere iri doreri mera

dorebiro dopa ta mua sãre iri doreri dorebeaa. Mũa Cristo ya curu majarã áhrra. Eropirã dohpaguere ïgu yarã áhrra mua. ïguru ïgu sãrira puhru masa muriadigu árimi Goãmu gamerire mari iiboro dopa. ⁵ Jesucristo yarã áribirirasubuguere ñerire mari uaribejarire iimuribu. Eropirã Moise dorerire mari masira puhru iri dorerire tarinugadiaribu. Eropa tarinugã ñerire iirã, mari peamegue wamorã ta árimuribu. ⁶ Dohpaguere Cristo yarã árirã iri doreri docague áribeaa pare mari. Goãmu ïgu mera ôaro mari áriborore iri dorerire iidorebeamu pare. Espiritu Santo mari mera árigu marire ôarire gohrotocũ iimi. Eropirã Goãmu gamerire iirã mari iribojegue maja doreri gojara mera árimasibea pare.

Mari ñeri iidiarire were gojañumi Pablo

⁷ ¿Eropirã Goãmu Moiseru ïgu dorerare dohpa arĩ pepibocuri mari? ¿Iri doreri ñeri áricuri mua pepicũ? Áribirica. Iri ïgu doreri ta ñerire yare masicũ iibu. Eropirã ïgu doreri maricũ ñerire mari iirare masibiriboya mari. ïgu doreri ôpa arãa: “Gajirã yaguere turaro uaribejabiricãque,” arãa Moise doreri. Iri eroparibiricũ, gajirã yare uaribejariñe iri ñeri áricũ masibiriboya mari. ⁸ Eropigu iri dorerire yu masira puhru gajirã yare burigã uaribejamuribu. Iri dorerire masibirinigu gajirã yare burigã yu uaribejara iri ñeri áricũ masibiriboya yuhũ. ⁹ ïgu dorerire yu masiboro core eropa pepicanibu dohpa. Dipuwajacuborore guñabiriribu. Eropigu ïgu dorerire yu masira puhru yu uaribejari ñeri áricũ masibu yuhũ. Eropigu yu dipuwajacuborore masibu. ¹⁰ Iri doreri mera mari Goãmu mera ôaro áribonirã áriquererũ mari iri doreri mera dipuwajacurã dederebonirã áribibu. ¹¹ ïgu Goãmu Moiseru dorerare masira puhru tarinugadiaribu. Ñerire uaribejagu áricũ iri ñeri yare goroweobu. Ñerire iirã iri dorerire tarinugara waja dipuwajacumorã áribibu mari. Eropirã iri doreri tarinugari mera peamegue dederebonirã áribibu.

¹² Eropiro Moise doreri Goãmu ya ôari áhrra. Eropiro queoro áriro iiaa. ¹³ ¿Eropa áriquerero iri ôari doreripu peamegue marire wacũ iiri mua pepicũ? Wadorebeaa. Mari ñeri iiri dipuwaja marire peamegue ñero wacũ iiaa. ïgu dorerire mari masira puhru iri dorerire tarinugarã, “Ñerire iiaa mari,” arĩ masia. Eropirã mari ñerã áririre masirã mari peamegue waboro sãre masia mari. Eropirã ïgu dorerire masirã, mari tarinugara iri ñeri áricũ masia mari.

¹⁴ Moise doreri Goãmu ïgu apira iri áricũ masia mari. Irire masiquererã maripu ñeri uaribeja iirã i ôaripure iibea. Eropirã ñerire iiniguirã áhrra. ¹⁵ Mari ôarire iidiaquererã iibea mari. Eropirã mari ñerire iidibiriquererã ta iiniguicãa. Eropirã mari iirire pee masibea mari. ¹⁶ Eropirã ñerire iidibiriquererã ñerire iiaa mari. Iri ñerire iidibirã Moise ïgu dorerire “Ôari doreri áhrra,” aridiarã iiaa. ¹⁷ Eropirã “Yu basi ñerire dipaturi iisome pare,” ariquererã ta ñerire iiniguia. Mari pepirigue áripurũ ñerire marire iicũ iiaa. ¹⁸ Ôarire turaro iidiaquererã ta, ne bocatiubirica. Eropirã ôpa masia. Ñeripu marire goroweomuraa. Mari pepirigue ñeri dihta áhrra. Ne ôari mara. ¹⁹ Ôari mari iidiaripure ne iibea. Ñerire mari iidibiriripure iiaa. ²⁰ Eropirã “Yu basi ñerire dipaturi iisome pare,” ariquererã ta ñerire iiaa daja. Mari pepirigue áripurũ marire ñerire iicũ iiaa.

²¹Eropiro òpa wahaa marire. Òarire mari iidiaquerecũ ta mari ùaribejari mari pepiri ñeri àhraa. Eropirã òaripũre iibea mari. ²²Goãmũ dorerire mari turaro yùhridiarica. ²³Eropirã mari ire masia: Goãmũ dorerire gamequererã mari ñeri pepiri mari ùaribejari àhraa marire. Mari ñeri pepiri tarinũgaa mari òari iidiaripũre. Eropirã mari ñerire duhumasibea.

²⁴Eropa ñerire duhumasibirã ñero dujaa mari. ¿Mari ñeri ùaribejarire duhuboro dopa, mari ñeri pepiri marire dorebiriboro dopa noa marire taugũcuri? ²⁵Jesucristore mari guñaturacũ ìgũpũ mari ñerire iibiriboro dopa taugũcumi. Ìgũ mari Opũ mari ñeri ùaribejarire tautuhajadi árími. Ìgũ eropiicũ Goãmũre “Òhaa,” arãa mari. Eropirã dohpaguere mari Goãmũ dorerire yùhridiarã àhraa. Eropa yùhridiaquererã ta mari pepirigue ñero pepiri àhraa dohpa. Mari eropa árirãre Jesucristo marire taumi.

Espíritu Santore oparã erã áríricũre were gojañumi Pablo

8 ¹Dohpaguere Jesucristo yarãre erã dipuwajacũboro mara. Erã ñerire erã ùaribejarire iiniguibeama. Eropirã Espiritu Santo ìgũ dorero dopa ta iiniguicãma erã. ²Eropigũ Jesucristo yarã mari áricũ Espiritu Santo ñero iirire duhucũ iimi marire. Eropigũ Espiritu Santo áripehrerinũri Goãmũ mera áricũ iimi marire. Ñerire marire duhucũ iigũ, marire peamegue wabonirãre taumi. ³Moise dorerire mari gamero iirã ne bocatiusome. Eropirã iri doreri mera mari Goãmũ mera òaro árimasibiribũ. Mari eropa árirã áriquererã ta òpa Goãmũ marire òarã áricũ iidigũ árími. Irire mari ñeri dipuwajare wajayebasabure ìgũ magure obeodigũ árími. Ìgũ magũ mari iro dopa ta dũpũcũdigũ árími. Eropigũ wajayebasagũ mari pepirigue ñeri áririre cóadigũ árími. ⁴Marire eropa ta iidigũ árími Goãmũ ìgũ dorerire òarire ìgũ turari mera mari iiboro dopa. Ìgũ dorerire iirã árirã mari ùaribejarire iibea mari. Eropirã Espiritu Santo ìgũ itamuri mera ìgũ dorero dopa ta iiaa mari.

⁵Erã gamero ñerire iidiarã, ñeri dihtare ùaribejama. Espiritu Santo ìgũ dorero dopa ta iiniguirãpũ òari dihtare iidiamã erã. ⁶Erã gamero ñeri dihtare iidiarã, iri dihtare ùaribejarã peamegue warãcoma. Espiritu Santo ìgũ gamerire turaro iidiarãpũ áripehrerinũri Goãmũ mera árirãcoma. Eropirã erã òaro áricãrãcoma. ⁷Erã gamero iirã Goãmũre gamesũribirã àhrima. Erã Goãmũ dorerire ne yùhribeama. Ìgũ dorerire ne yùhrimasisome erã. ⁸Eropirã erã gamero iirã Goãmũre ìhasuacũ iimasibeama.

⁹Mũapũ mũa gamero iibea. Espiritu Santo mũa mera áricũ ìgũ gamerire iiaa. Eropirã Espiritu Santore moorãpũ Cristo yarã áribeama. ¹⁰I mũmũre masa ñerire iira dipuwaja mari áripehrerã sĩrimorã dihta àhraa. Mũa sĩrimorã áriquererã ta Cristo yarã mũa árirã ìgũ mera eropa áriniguirãca mũa. Goãmũ mũare “Òarã àhrima,” ìgũ arĩ ìacũ ìgũ mera eropa áriniguirãca mũa. ¹¹Goãmũ Jesure masudigũ árími. Eropa masudigũ árigũ, Espiritu Santo mũa mera ìgũ áriniguicũ mũa sĩrira pũhrũ Goãmũ mũa sãre masugũcumi. Eropa masugũ òaro áricũ iigũcumi mũare. Jesure ìgũ masudiro dopa ta eropa masugũcumi mũare.

Cristo ya turari mera ñeri iirire tarinugarāca mari, arī gojañumi Pablo

²⁸Ire masia: Árīpehererā Jesure mahirā mari árīcū ĩgu gamerire iimorāre beyepu ĩgu marire. Eropa beyegu Goāmũ eropa ĩhadibuniguicāmi marire. Eropigu mari ñero taricū ĩagu Goāmũpu marire ōaro wacū iigucumi. ²⁹Goāmũ marire ĩgu yarā árīmorāre matague ta mari ne masa dehyoaboro coregue ta guñatuhapu. Eropa guñagu ĩgu magu ĩgu ōagu árīro dopa ta marire ōarā árīrare guñapu. ĩgu magu iro dopa marire árīdorepu bajarā masa ĩgu magure mari tīgucuborore. Eropigu árīpeherero marire eropa wara mera marire ōarā gohrotocū iimi. ³⁰Matague ta ĩgu yarā ĩgu árīdorenirā mari árīcū, ĩgu porā mari árīmorā sāre beyepu marire. Eropigu marire ĩgu beyenirāre “Dipuwaja moorā, ōarā āhrima,” arī ĩhami. Marire ĩgu eropa “Ōarā āhrima,” arī ĩagu ĩgu mera ũmaroguere ōaro árīcū iigucumi.

³¹Irire masirā ōpa pepia mari: Goāmũ marire ĩgu mahinirāre, ne gajirā ĩhaturirā bocatiubeama. ³²Goāmũ mari ya dipuwaja sīribure ĩgu magure obeodigu árīmi. “Yũ magure mahia. Eropigu ĩgure obeobea,” arībiridi árīmi. Eropigu mari ya árīburire ĩgu magure obeodigu árīgu Jesucristo mera árīpehererire ōari dihtare ogucumi ĩgu marire. ³³Goāmũ beyenirā mari árīcū, ĩgu marire “Dipuwaja moorā, ōarā āhrima,” arī ĩhami. Mari ĩgu eropa arīnirā árīcū, gajirā marire “Ñerā āhrima,” ne arī weresāmasibeama. ³⁴Cristo mari ya dipuwajare sīrira pũhrũ masa mũriadi árīmi. Eropigu Goāmũ diayepu dohpaguere ĩgu āhrimi dorebu. Eropigu ĩgu mari ya árīburire diaye ta ũmuri nũcu serēbasagu iimi Goāmũre. Eropirā gajirāpu ne marire “Erā ñeri iira dipuwaja moaque,” arīmasibeama. ³⁵Cristo marire ĩgu buriḡā mahicū gajirāpu “Erāre ne mahibiricāque,” arīmasisome ĩgure. Eropigu mari ñero tariquerecū ta, mari güiquerecū ta, gajirā marire erā ñero iiquerecū ta, mari oaboaquerecū ta, suhri marirā mari árīquerecū ta, guhyaro marire árīquerecū ta, marire erā wejēquerecū ta, Cristo marire eropa mahiniguicāgucumi.

³⁶Goāmũ yare erā gojarapũ marire eropa waburire werero ōpa arī werea:

Goāmũ, mũ yarā gua árīri waja erā wejēsũmorā ta árīniguirā tiiaa gua. Oveja erā wejēmorā erā árīro dopa ta, gua sāre eropa ta wahaa, arī gojañuma Goāmũ yare erā gojarapũgue.

³⁷Eropirā mari ñero tariquererā ta, Cristo marire mahigu ĩgu itamuri mera, turaro mera ñerire tarinugarāca mari. ³⁸⁻³⁹Goāmũ marire ĩgu mahirare ĩhmudi árīmi mari Opũ Jesucristo mari ya árīburire sīricū. Eropigu ĩgu marire buriḡā mahigu ne duhosome. Mari sīricū sāre, mari ojocaricū sāre mahi duhosome. Dohpaguere, pũhrũgue sāre, marire ĩgu ne mahi duhosome. Eropirā anyua, watēa oparā ũmaro majarā, i yeba majarā oparā, ñerā deyobirā sā marire Goāmũre “Mũ yarāre mahibiricāque,” arīrā, bocatĩsosome. Eropiro ne yuḡuḡu ne yuḡuñe ĩgu ĩhacũnugura marire ĩgũpũre mahi duhudoreri ne mara. Marire ĩgu ne mahi duhosome.

Judio masa Goãmũ ìgũ beyenirã àhřima, arĩ gojañumi Pablo

9 ¹⁻²Yũ acawererã Israe masare guñagu burigã bujawerea. Cristore gamebeama erã. Eropigũ ñero sĩporãcũ pepia yũhũ. Iri yũ eropa arĩri diaye ta àhřaa. Yũhũ Cristo yagu àhřaa. Eropigũ muare diaye arĩgũ iiaa. Espĩritu Santo yũ mera áricũ dohpaguere yũ acawererãre yũ arĩri iri diaye áricũ òaro masia yũhũ. Ìgũ yũre irire òaro masicũ iimi. ³Israe masa yũ acawererã, yaha curu majarã Jesucristore gamebirã peamegue warãcoma, arĩ guñaricua. Eropigũ yũhũ erãre peamegue wamorãre taumasigũ òpa arĩboya Goãmũre. “Erã ya dipuwajare yũpũre peamegue wadoreque,” arĩboya. Eropigũ “Erã ya dipuwajare yũpũre cóãporo Cristo,” arĩboya. Yũ eropa arĩborañe wajaye masiya mara erã ya dipuwajare. ⁴Erã yũ acawererã Goãmũ yare òarire mata opamũhtanirã ářĩma. Israe mũrũ pãramerã ářĩturiarã àhřima. Eropigũ Goãmũ ìgũ porã erã ářĩburire mata apĩñumi Goãmũ erãre. Eropigũ Goãmũ ìgũ gosesiriri mera erã watope ářĩñumi. Eropiro ářĩpehřerire ìgũ masare òaro iiburire weremũriñumi erãre. Eropigũ Moiserẽ ìgũ dorerare mata apimũhtañumi Israe masare. Eropirã Goãmũre umupeoburi wihire iimũhtañuma erã. Eropigũ erãre ìgũ òaro itamuborore weremũriñumi Goãmũ. ⁵Gũa ya cururi gohra doce cururi àhřaa. Eropirã gũa ñecũ sũmarã Abrahã sã mũrague, erã pãramerã ářĩturiarãgue àhřaa gũa Israe masa. Eropigũ Cristo masa dehyoanijagu gũa acaweregũ Israe masũ gohra ářĩmi Cristo. Ìgũ Goãmũ ta àhřimi. Eropigũ ìgũ ářĩpehřerã weca opu àhřimi. Ářĩpehřerĩnũri ìgũre òaro umupeorã mari. Eropa ta iirã.

⁶Israe mũrũ ìgũ pãramerã ářĩturiarã ářĩquererã ářĩpehřerã Goãmũ yarã gohra ářĩbeama. Eropirã ářĩpehřerã Goãmũ òaro oburire opamorã ářĩbeama. Eropirã Israe masare “Òaro iigũra,” arĩdigũ ářĩqueregũ Goãmũ erãre ářĩpehřerãre òaro iibiricũ ìarã “Goãmũ ìgũ arĩdiro dopa ta iibeami,” arĩ pepibiricãro gahmea. ⁷Òpa àhřaa: Gajirã Israe masa Abrahã pãramerã ářĩturiarã erã ářĩquerecũ ta, “Abrahã pãramerã gohra yaharã gohra àhřima,” arĩ ìabeami Goãmũ erãre. Eropigũ òpa arĩñumi Goãmũ Abrahãre. “Mũ magũ Isaa pãramerã ářĩturiarã erã tamera diaye ta mũ pãramerã ářĩturiarã ářĩrãcoma,” arĩmũriñumi Goãmũ Abrahãre. ⁸Ìgũ eropa arĩ werecũ ire masirãca mari: Ářĩpehřerã Abrahã pãramerã erã masa dehyoara pũhřũ, mata Goãmũ porã wasome erã. Goãmũ ìgũ arĩ werepirare òaro peerã ìgũre umupeorãpũ erã dilta ářĩrãcoma Goãmũ porã. Eropirã erã ta àhřima Abrahã pãramerã ářĩturiarã gohra. ⁹Òpa arĩñumi Goãmũ Abrahãre: “Gaji bojori inosubu ta yũ dujaricũ mũ marapo Sara majigũgãre opagocumo mũ magũre,” arĩñumi Goãmũ Abrahãre. Eropa ta arĩ werepiñumi ìgũre Abrahã magũ Isaa masa dehyoaborore. Eropigũ ìgũ magũ Isaa masa dehyoañumi. ¹⁰Pũhřũ Isaa Rebeca mera marapocũcũ igo mũma perã sũhřũanirã porãcũñumo. Erã pagũ Isaa gũa ñecũ mũrũ ářĩñumi. ¹¹⁻¹²Eropirã erã porã erã masa dehyoaboro core, òarire, ñeri sãre erã iibiricũ ta Goãmũ erã pago ářĩbore òpa arĩmũriñumi: “Ìgũ pagũ magũpũ ìgũ tĩgũre doregũcumi. Eropigũ ìgũ opu ářĩgũcumi,” arĩmũriñumi igore igo porãcũborore core. Goãmũ ìgũ gamero dopa ta beyemi ìgũ. Eropa ářĩgũ, ářĩgũ ìgũ

dehyoaboro core Jacobore Esaú pagu magu árĩgure opu árĩbure beyemurĩnumi. Eropigu masa erã iirire ïaboro core igu gamero dopa ta igu yarã árĩmorãre beyemi. ¹³Eropa ta arĩ gojañuma igu yare erã gojarapũgue: “Jacobopũre mahimurĩbu. Eropigu Esaúpũre mahibirimurĩbu,” arĩmi Goãmũ, arĩ gojañuma iribojegure.

¹⁴¿Iirire peerã dohpa arĩ pepibocuri mari? “¿Erã iiricurire ïaboro core yujugure eropa beyegu Goãmũ queoro iibeami,” ¿arĩ pepibocuri?” Árĩbeaa. Queoro iigu ta ãhrimi. ¹⁵Ōpa arĩñumi Goãmũ Moise sãre: “Yũ gamegu dihtare mojomoro ïagũra,” arĩmurĩnumi igu Moisere. Eropigu yujugure igu gamero beyegu queoro iigu iimi Goãmũ. ¹⁶Eropirã mari gamero Goãmũre marire mojomoro ïadoremãsibea mari. Eropirã mari òarire iira waja sãre ne mojomoro ïabeami igu. Igu gamero dopa ta mojomoro ïhami. ¹⁷Eropigu eropa ta igu gamero dopa iĩnumi Egipto majarã opu sãre. Ōpa arĩñumi Goãmũ igure faraõre: “Egipto majarã opu árĩbure apigu iĩbu mũre yũ turarire árĩpehrerãre ïhmubure. Eropigu árĩpehreri yeba majarãre, yũre erã masiborore opu acugu iĩbu yũhũ mũre,” arĩñumi Goãmũ igure, arĩ gojara ãhraa Goãmũ yare erã gojarapũgue. ¹⁸Eropigu igu gamerãre mojomoro ïhami igu mari masare. Eropigu igure erã gamebircũ ïagu igu gamero erãre yũhrĩbircũ iimi igu. Eropigu Goãmũ igu gamero dopa ta iimi.

¹⁹Igu eropiigu árĩcũ ïarã òpa arĩboca mũa: “¿Goãmũ erãre igure yũhrĩbircũ iidigu duhpigu ero pũhrũ erã igure yũhrĩbirira dipuwaja moayuri erãre?” arĩ papũri serẽpiboca mũa. ²⁰Eropa arĩbircãque. Mari masa bu árĩrã ãhraa. Goãmũ mera papũrimãsibea. Mátasoro wéagore “¿Duhpigo yũre eropa iiri mũhũ?” iri soro arĩ serẽpimãsibea. Eropa ta mũa sã Goãmũre igu gamero iigure “¿Duhpigu eropa iiri mũhũ?” arĩ serẽpimãsibea. ²¹Mátasoro wéago máta mera igo gamero dopa iimo. Eropigo òarire dibuburi sorore iimasimo igo. Iri máta mera ta bu árĩri dibuburi soro sãre iimasimo igoa. Igo iiro dopa ta Goãmũ sã igu iidiaro dopa ta iimi.

²²Eropigu Goãmũ peamegue igu cóãmorãre erã ñero iirare ïha guagu, erãre dipuwaja moadiaqueregu ta yoari boje erã ñeri iirire eropa ïacãnimi. Árĩpehrerãre igu turarire ïhmubu, mata erãre dipuwaja moanibirimi. ²³Eropa ta iimi marire igu mojomoro ïarãre, igu òatariagu igu árĩrĩre, igu turari sãre marire masidorebu. Matague ta marire, “Erãre mojomoro ïagũra yũhũ. Yũ òarire ogũra erãre,” arĩ apiñumi Goãmũ marire. ²⁴Eropirã maripu igu beyenirã árĩrã iiaa. Eropirã igu beyenirã judio masa dihta árĩbeama. Judio masa árĩbirã sã ãhrima igu beyenirã. ²⁵Eropa ta ãhraa judio masa árĩbirãre Goãmũ yare Osea waĩcũgu igu òpa arĩ gojadiro dopa ta:

Ero coregue yaharã árĩbirinirãre pũhrũ erãre “Yaharã ãhrima,” arĩgũra. Eropigu ero coregue yũ mahibirinirãre pũhrũgue erãre “Yũ mahirã ãhraa mũa,” arĩgũra, arĩpu Goãmũ. ²⁶“Yaharã árĩbeaa mũa,” Goãmũ igu arĩra yeba majarã Goãmũ ojocarĩnguicãgu porã ta árĩrãcoma, arĩ gojamũhtamurĩnumi Osea iribojegure.

²⁷⁻²⁸Eropigu iribojegue majagu Isaia Israe masare òpa wereñumi: “Mari Opu i yeba majarãre bajarã masare yojaro mera diaye ta dipuwaja moa

purumujugucumi. Eropirã wuariya maja imipayeri iro dopa Israe masa bajarã gohra erã áríquerecũ ta bajamerãgã tarirãcoma erã,” arĩmuriĩnumi Isaia. ²⁹Eropigũ dipaturi ta wereyugũ õpa arĩ gojañumi Isaia:

Mari Opũ árĩpehrerã weca opũ bajamerãgã mari mera majarãre taubigu, marire judio masare árĩpehrerãre dederecũ iiboĩnumi ĩgu. Sodoma majarãre, Gomorra majarã sãre ĩgu dedeopehocũ iidiro dopa ta mari sãre dederecũ iiboĩnumi ĩgu, arĩ gojamuriĩnumi Isaia.

Judio masa õari buherire gamebirima, arĩ gojañumi Pablo

³⁰Eropa ta àhrra. Eropirã ire masique mũa: Judio masa árĩbirãpũ Goãmũre amabiriquererã ĩgũre bocama. Jesucristore erã umupeocũ, “Õarã àhrrima,” arĩ ĩhami Goãmũ erãre. ³¹“Goãmũ dorerire Moiserẽ ĩgu apirare mari iicũ ĩgu marire õarã ĩagucumi,” arĩriĩnorã judio masapũ. Eropa ĩgu dorerire erã iiquerecũ ta Goãmũ ĩha suabirimurĩpũ erãre. Eropirã õarã árĩdiaquererã bocatĩubirimuriĩnorã. ³²Erã Jesucristore umupeoro mariro erã gamero Moise dorerire iidiarima Goãmũ mera õaro árĩdiarã. Eropirã Cristore erã ñeri iirare cóãbure gamebirã Goãmũ pohrogue ne ejasome.

³³Eropa ta arĩ gojamũhtañuma Goãmũ ĩgu magũre wereyurire:

Ûtãye iro dopa árĩgũre, yũ beyedigũre dohpague Jerusaléngue apigũ iiaa. ĩgũre umupeobirã, ĩgũre tarinũgarã yũ pohrogue ne ejasome. Eropirã ĩgũre umupeorãpũ ĩgu mera õaro mucubiriniguirãcoma. Yũ pohro warãcoma, arĩmi Goãmũ, arĩ gojañuma Goãmũ yare erã gojarapũguere.

10 ¹Yũ acawererã, Israe masare Goãmũ ĩgu tauborore burigã gahmea yũhũ yũ siporã mera. Eropigũ Goãmũ erãre ĩgu tauburire serẽbasaa yũhũ. ²Diaye ta erã Goãmũ gamerire iidiarima. Eropa iidiaquererã ta ĩgu gamerire masibeama. ³Eropirã Goãmũ erãre õacũ iilurire masibeama. Eropa masibirã erã gamero õarire iiquererã bocatĩubirima. Erã eropiicũ, erã Goãmũ Jesucristore umupeodorediro dopa erã iibiricũ, ĩgũpũ erãre “Õarã àhrrima,” arĩ ĩabirimi. ⁴Cristore umupeorãre “Dipuwaja moorã, õarã àhrrima,” arĩ ĩhami Goãmũ. Eropirã “Mari ñeri iira dipuwaja Goãmũ tauboro dopa Moise dorerire iiro gahmea daja,” arĩ pepibiricãro gahmea. Cristore umupeorã ĩgu mera taria.

⁵Moise iribojegue majagũ õpa arĩ gojañumi: “Goãmũ dorerire mari dũhyaro mariro iipehocũ Goãmũ marire ‘Dipuwaja moorã, õarã àhrrima,’ arĩ ĩagucumi,” arĩ gojañumi ĩgu. ⁶ĩgu eropa arĩ gojaquerecũ ta dohpaguere masa Cristore erã umupeocũ Goãmũ erãre “Õarã àhrrima,” arĩ ĩhami. Iri buheri “Cristore umupeoque,” i arĩ buheri õpa arĩ werea: “Õpa arĩ pepibiricãque mũa: ‘¿Noa Cristore umaroguere árĩgũre aĩdijugucuri marire ĩgu buhecũ daja?’ arĩ pepibiricãque mũa. Cristo eratuhadigũ árĩmi marire taugũ eragũ i yebaguere. ⁷Eropirã daja ‘¿Noa sĩrinirã pohrogue Cristore masu aĩgãribocuri?’ arĩ pepibiricãque mũa. ĩgu sĩridigũ masa muriadigũ árĩmi,” arĩ werea i buheri. ⁸Eropiro õpa arĩ werea Goãmũ yare erã gojarapũgue: “Goãmũ ya buherire mari amacũ ĩgu buheri ohõ àhrra. ĩgu buherire

masituhaa m̄ua. Eropirā īḡu buherire wereniguim̄rabu,” arī gojañuma. Iri buherire “Cristore umupeoque,” arī buherire masare werea ḡua. ⁹Iri buheri ōpa arī werea: “Jesu yu opu āhrimi,” arī mari disiro mera werecū, “Goām̄u Jesure s̄iridiḡure diaye ta masuñumi,” arī mari pepicū īha Goām̄u marire peamegue wabonirāre tauḡucumi. ¹⁰Jesure mari umupeocū īha Goām̄u marire “Ōarā āhrima,” arī īaḡucumi. Eropiḡu gajirāre “Yuh̄u Jesucristore umupeoa,” mari arī werecū īha īḡu marire peamegue wabonirāre tauḡucumi.

¹¹Ōpa arāa Goām̄u yare erā gojarapū: “Īḡure umupeorā, īḡure erā umupeorare ne bujaweresome. ‘Īḡure umupeobiricū ōaboaya yure,’ ne arīsome,” arīyoro Goām̄u yare erā gojarapūgue. ¹²Judio masare, judio masa ár̄ibirā sāre Goām̄u yujuro mera ta itamumi. Mari Opu ár̄ipehrerā tauro opu āhrimi īḡu. Eropiḡu ár̄ipehrerāre īḡure serērāre itamuḡucumi īḡu. ¹³Eropa ta arī gojañuma Goām̄u yare gojarapūgue ōpa arī gojarā: “Yu ñerire cóaque. Eropiḡu yure tauque,’ masa erā serēcū erāre peamegue wabonirāre mari Opu tauḡucumi,” arī gojañuma. ¹⁴Eropirā masa Cristore “Diaye ta marire taugu āhrimi,” arī umupeobirā īḡure eropa serēmasibeama erā. Eropirā īḡu buherire Jesucristo erāre tauburi buherire peebirā īḡure umupeomasibeama. Eropirā īḡu buherire erāre wereḡu maricū Goām̄ure erā masisome. ¹⁵Eropirā īḡu buherire weremorāre erā obeobiricū īḡu buherire weremasibeama. Ōpa arī gojañuma Goām̄u yare erā gojarapūgue: “Ōari buherire marire ōarā wacū iiburi buherire weremorā erā eracū īarā ōaro mucubiria mari,” arī gojañuma iribojegure.

¹⁶Eropa arīquerēcū ta masa bajarā Jesucristo yare ōari buherire peediabeama. Eropa ta arī gojam̄riñumi Isaia: “Opu, erāre mari wererare ne peediabeama,” arī werem̄riñumi Isaia Goām̄ure. ¹⁷Eropirā masa Jesucristo yare ōari buherire peerā peeñarā Cristore umupeoma.

¹⁸Eropiḡu ire serēpidiaca m̄uare: ¿Israe masa Jesucristo yare peebiriyuri m̄ua pepicū? Yuju diaye ta erā peem̄ririñuma. Eropa ta āhraa Goām̄u yare erā gojarapū sāre:

Goām̄u yare wererā ár̄ipehreroguerere weresirirā wama. Eropirā ár̄ipehrero majarāḡue īḡu yare peema, arī gojañuma iribojegue. ¹⁹Dipaturi m̄uare serēpidiaca daja: ¿Israe masa peequererā ōaro masibiriyuri m̄ua pepicū? Masiriñuma. Masiquererā Jesucristore umupeodiabiriñuma. Erā eropa peediabiricū gaji yeba majarā Goām̄u yarā wahama. Irire werenemoḡu Moise īḡu arīrare werem̄htaḡura: Ōpa arī gojañumi īḡu:

Ōpa arī weremi Goām̄u Israe masare: “Bu ár̄irā āhrima,’ m̄ua arī īanirāre yaharā ár̄imorā iiḡura. Yu erop̄icū m̄uapu erāre īhaturirāca. Eropiḡu m̄uare erā mera guacū iiḡuca yuh̄u, arī weremi Goām̄u,” arī gojañumi Moise.

²⁰Isaia s̄a doyarō mariro ōpa arīm̄riñumi:

Ōpa arīmi Goām̄u: “Yure amabirāpu yure bocama. Eropiḡu yure masibirāre erāre yure masicū iibu yuh̄u,” arīmi Goām̄u, arī gojañumi Isaia. Judio masa ár̄ibirā Goām̄u yarā erā waburire weregu eropa arī gojañumi.

²¹Israe masa püre òpa ari gojañumi Isaia: “Òpa arimi Goãmũ: ‘Mũa ñeri iirare bũjawereque yaharã wamorã, arimũiribu erãre. Erãpũ yũre tarinũgarã yũre yũhribirimũrima,’ arimi Goãmũ,” arĩ gojañumi Isaia.

Yujurãyerire Israw masare taugũcumĩ Goãmũ, ari gojañumi Pablo

11 ¹¿Eropigu Israe masare Goãmũ igu beyenirãre erã tarinũgacũ erãre cõãpehocãyuri igu mũa pepicũ? Áribeaa. Erãre cõãbirimi igu. Yũ sã Israe masũ, Abrahã pãrami árituriagu ãhrraa. Eropigu Benjami ya curu majagu ãhrraa. ²Iribojegue Goãmũ Israe masare beyemũriñumi. Ìgu eropa beyenirãre cõãbeamĩ. Goãmũ yare erã gojarapũ Elia igu iirare werea. Iripũ Israe masare Elia Goãmũre igu arĩ weresãrare masica mũa. Òpa arĩ weresãñumi igu: ³“Opũ, erã Israe masa mũa yare weremũhtanirãre wejẽpehocãma. Eropirã mũre umupeori mesarire cõãpehocãma. Eropigu erã watope yũ dihta mũ yagu dujaa dohpaguere. Yũ eropa áricũ ñarã yũ sãre wejẽdiama dohpaguere,” arĩñumi Elia Goãmũre. ⁴Ìgu eroparicũ peegu òpa arĩ yũhriñumi Goãmũ Eliare: “Mũhũ yahagu yujugu ta áribeaa. Siete mil mũa yaharã ãhrrima dohpaguere. Erãre dihbuabu yũhũ. Erã sã yũre òaro umupeoma. Baal waicũgu wẽadigũre ne umupeobirimũrama erã sã. Eropigu giũbita mũhũ,” arĩñumi Goãmũ Eliare iribojeguere. ⁵Irisubure Elia igu áriisubure igu yarã árimorãre Goãmũ igu dibudiro dopa ta dohpague sãre bajamerãgã Israe masare igu yarã árimorãre dihbumi. Goãmũ erãre mojomoro ñagu dihbumi. ⁶Óarire erã iicũ ñagu dibubirimi. Erãre mojomoro ñagu dibugu beyemi. “Óarire mũa iira pũhrũ mũare beyegura,” arĩgu, igu diaye ta erãre mojomoro ñagu iibiriboñumi. Óarire erã iira pũhrũ erãre igu beyecũ erãre wajatari áriboya. Óarire erã iibiriquerecũ ta erãre diaye ta mojomoro ñagu Goãmũ beyemi erãre. ⁷Eropa iri òpa ãhrraa: Israe masare Goãmũ erãre, “Óarã ãhrrima,” igu arĩ ñacũ gamequererã ta erã yujuro bojebeama. Goãmũ igu basi igu beyenirãpũ òarã wahama igu mera. Ìgure yujuro bojebirãpũ igu yare peediabeama. ⁸Eropa ta arĩyoro Goãmũ yare erã gojarapũ: “Goãmũ ñgure gamebirãre igu yare peebiricũ iimi. Eropigu diaye áririre erã peequerecũ erãre òaro peebiricũ iimi Goãmũ. Eropa ta áriñguicãma dohpague sãre,” arĩ gojañuma iribojeguere.

⁹Eropigu òpa arĩñumi Davi mũrũ iribojegue majagu Goãmũre: Erã Israe masa erã bosenũri mucubiririnũri iirã ñero iima erã. Erã eropa iicũ ñagu dipuwaja moaque mũhũ erãre. ¹⁰Erãre òaro peebiricũ iique mũhũ. Eropirã eropa dipuwajacũrã áriñguicãporo erã. Eropirã eropa bũjawereniguicãrãcoma, arĩñumi Davi Goãmũre.

Judio masa áribirãre peamegue wabonirãre taugũcumĩ Goãmũ, arĩ gojañumi Pablo

¹¹¿Judio masa Cristore erã gamebiricũ ñagu Goãmũ erãre cõãcãyuri mũa pepicũ? Cõãgohracãbiriñumi. Eropa erã Cristore erã gamebiricũ dohpaguere judio masa áribirãpũ Goãmũ igu taumorã wahama. Dohpaguere igu yarã iimi Goãmũ erãre. Ìgu eropiicũ ñarã yujurãyeri judio masapũ erãre ñhacũ erã

sã Jesucristore umupeodiama. ¹²Judio masa erã Goãmure tarinugacũ judio masa árĩbirãpũ Goãmũ ïgu õari buherire peema. Eropirã árĩpehrero majarã judio masa árĩbirã Goãmũ taumorã wañorã õaro warã. Pũhrũ judio masapũ Cristore erã umupeonũgara pũhrũ tamerare i yeba majarãre õatariaro waroca.

¹³Dohpaguere mũare judio masa árĩbirãre werebu iiaa. Cristo apimi yure mũare judio masa árĩbirãre buhebure. Eropa buhegu bu gohra iigu iibea. ¹⁴Yure eropa buhedoredigu árĩgu masare weremura. Yũ acawererãre judio masare mũa Jesucristo umupeorare ïhacũcũ iidiagu werea. Goãmũ taunirã mũa árĩcũ ïarã erã sã Cristore gahme ïgu taumorã wabocoma, arĩgu werea. ¹⁵Dohpaguere judio masare Goãmũ boje apigu, gajirãguere õari buherire Goãmũ weredoremi ïgu mera erã õaro árĩmorãre. Eropiro judio masare ïgu boje apicũ õaro wahabu i yeba majarãre judio masa árĩbirãre. ïgu eropiidiro tauro judio masa sãre ïgu yarã árĩmorãre ïgu iicũ tamerare õatariaro waroca i yeba majarãre. Goãmũ mera erã õaro árĩcũ bajarã masa Jesure umupeorãre peamegue wabonirãre taugũcumi. ¹⁶Õpa ãhraa: Abrahã gũa ñecu mũrũ Goãmũ mera õaro ïgu árĩdiro dopa ta ïgu pãramerã árĩturiarãgue sã Goãmũ mera õaro árĩrãcoma Cristore umupeorã árĩrã.

¹⁷Yujurãyeri erã eropa árĩrã árĩquerecũ ta gajirã erã acawererãpũre judio masare Goãmũ boje apinimi dohpa. Judio masa Goãmũ ïgu beyemũhtanirã olivo waicũdigu otedigu dũpũri iro dopa ãhrima. Mũa judio masa árĩbirã ïgu beyemũhtanirã árĩbirã nũgu majagu dũpũri iro dopa ãhraa. Olivo otedigu dũpũri yujuyeri dũpũri ïgu tabe cóãdiro dopa ta gajirã judio masapũre Goãmũ cóãmi. Eropa cóãgu ïgu yarã árĩbirã wacũ iimi erãre. ïgu cóãra dũpũri gaji dũpũri nũgu majagu dũpũri gohroto tuhboro dopa, Goãmũ judio masare judio masa árĩbirã mera gohrotomi. Eropa gohrotogu mũare judio masa árĩbirãre ïgu yarã wacũ iimi. ¹⁸Mũare ïgu eropa gohrotocũ, “Judio masa tauro õarã ãhraa pare gũa,” arĩ pepibircãque. Ire guñaque: Judio masapũre beyemũhtapũ Goãmũ. Mũapũ erã pũhrũ Goãmũ yarã árĩrã mũa sã Goãmũ õari oburire opaa. Eropirã “Judio masa tauro õarã ãhraa,” arĩ pepibircãque.

¹⁹Mũa judio masa árĩbirãpũ õpa arĩboca: “Yujurãyeri dũpũri ïgu cóãdiro dopa ta Goãmũ judio masare cóãmi yujurãyerire. Eropa cóãgu ïgu gaji dũpũri gohroto ïgu tuhdiro dopa ta ïgu yarã mari wamorãre apimi,” arĩboca mũa judio masare tarinugadiarã. ²⁰Õpa ãhraa. Erã Jesure umupeobirira dipuwaja cóãpũ Goãmũ erãre. Eropigu mũa sãre Jesure mũa umupeobiricũ ïgu yarã árĩmorãre mũare apibiriboañumi. Eropirã “judio masa tauro õarã ãhraa gũa,” arĩ pepibircãque mũa. Eropa arĩbirã ta Goãmũre õaro umupeoque. ²¹Mũhtari dũpũri iro dopa judio masa Goãmũ yarã árĩmũhtañuma. Iri gohroto tuhra dũpũri iro dopa ta erã pũhrũ mũa Goãmũ yarã wabu. Eropigu Goãmũ ïgu yarã árĩmũhtanirã ïgure umupeobiricũ ïagu cóãpũ erãre. ïgu erãre eropiidiro dopa ta mũa sãre cóãgũcumi mũa ïgure umupeobiricũ. Eropirã Goãmũre õaro umupeoque mũa. ²²Goãmũ mũare õaro iigu ïgu árĩcũ masique mũa. Eropirã gũhyadiaro mera, ïgu dipuwaja moagu ïgu árĩcũ sãre masique mũa. ïgure

umupeobiräre ĩgu dipuwaja moagucumi. Eropä ártiqueregu ta mua ĩgure umupeoniguiçũ muare õaro iigucumi ĩgu. ĩgure umupeobiricũ ñeri dũpũrire ĩgu tabe cõadiro dopa ta mua sãre cõãgucumi Goãmũ. ²³Masapũ erã tabe cõãra dũpũrire tuhumasibeamã daja. Goãmũpũ ártipehrero iimasigu ãhrimi. Eropigu judio masa ĩgu cõãnirã Cristore erã umupeodiacũ Goãmũ ĩgu yarã árticũ iigucumi daja erãre. ²⁴Mua judio masa áribirã Goãmũ yarã áribirimũriyoro. Eropä áribirã mua ártiquerecũ ta Goãmũ muare ĩgu yarã árticũ iigucumi. Eropigu ĩgu beyemũhtanirã mua áribiriquerecũ ta ĩgu yarã árticũ muare iidiami ĩgu. Eropigu judio masare ĩgu beyemũhtanirãpũre ĩgu yarã árticũ ĩgu tauro iidiaçucumi.

Pũhrũ Israe masare taugucumi Goãmũ, arĩ gojañumi Pablo

²⁵Yũ acawererã, ire masa erã masibirirare muare weregũra. Mua õpa arĩboca: “Dohpaguere gua dihtare beyemi Goãmũ. Guapũ masipehocãa,” mua arĩ pepiboca. Mua irire arĩ pepibiriboro dopa ire weregũra muare. Õpa ãhraa masa erã masibirira: Dohpaguere bajarã judio masa Goãmũre peediabirã ãhrima. Eropirã bajarã judio masa áribirãre Goãmũ ĩgu queodiropẽ ĩgu yarã wacũ iigucumi. Ero pũhrũ judio masapũ ĩgure gamerãcoma daja. ²⁶Erã eropa gamecũ ártipehrerã Israe masare Goãmũ taugucumi erã peamegue wabonirãre. Goãmũ yare erã gojarpũgue eropa ta arĩ gojañuma:

Jerusalén waicũri macague judio masa ya macague erãre taubu arigucumi.

Eropigu Jacobo mũrũ pãramerã ártituriarãre erã ñerire ĩgu cõãgucumi.

²⁷Eropigu erãre taugu iribojegue yũ arĩ erãre werepirare iigucumi, arĩmi Goãmũ, arĩ gojamũhtañuma Goãmũ yare erã gojarapũgue.

²⁸⁻²⁹Dohpaguere erã judio masa Cristo yare umupeobirã Goãmũre gamebeama. Erã eropiicũ dohpaguere mũrapũ judio masa áribirãpũ Cristore umupeonũgabũ. Judio masapũre Goãmũ beyemũhtañumi. Goãmũ ĩgu arĩ werepidiro dopa ta masare ĩgu beyediro dopa ta diaye iimi ĩgu. Eropigu judio masa ñecũ sũmarã mũra ĩgu beyenirã erã árticũ dohpague erã ártituriarã sãre ĩgu mahimi. ³⁰Iribojegue mua sã Goãmũre tarinũganirã ártĩriyoro. Dohpaguere judio masa Goãmũre erã tarinũgacũ ĩagu ĩgu mũrapũre mojomoro ĩagu taumi. ³¹Dohpaguere judio masa ĩgure tarinũgarã ãhrima. Erã eropa ártiquerecũ ta Goãmũ dohpamasapũre Goãmũ beyemũhtañumi. Goãmũ ĩgu arĩ werepidiro dopa ta masare ĩgu beyediro dopa ta diaye iimi ĩgu. Eropigu judio masa ñecũ sũmarã guere muare mojomoro ãadiro dopa ta erã sãre pũhrũ mojomoro ĩagucumi. ³²Õpa ãhraa: Ártipehrerã masare Goãmũ ĩgure erã tarinũgara waja yujuro mera dipuwajacũdoremi. Eropigu ártipehrerã erã dipuwajacũrã erã árticũ ĩha ártipehrerãre yujuro mera mojomoro ĩagucumi ĩgu.

³³Õatariagu ãhrimi mari Goãmũ. Turatariagu ãhrimi. Õaro masipehogũ ãhrimi ĩgu. Eropiro ĩgu guñarire, ĩgu iiburire marire õaro masiya mara. ³⁴Õpa arĩ gojañuma Goãmũ yare erã gojarapũgue: “Goãmũ mari Opũ ĩgu guñarire ne masa õaro masibeamã. Eropirã masa ĩgure ‘Õpa iique,’ arĩ weremasibeamã. ³⁵Eropirã masa Goãmũre erã gajino ora pũhrũ ‘ĩgu marire wajamomi,’ arĩ

masiya mara masa,” arí gojañuma iribojeguer. ³⁶Goãmũ árĩpehrerire iidi árĩmi. Eropigũ ãgũ turari mera árĩpehrerire árĩcũ iidoredi árĩmi ãgũ. Eropiro árĩpehreri ãgũ iiburi áhrra. Eropirã árĩpehrerinũri ãgũre umupeorã mari. Eropã ta iirã mari.

Goãmũ gamerire marire iinigicãdoreñumi Pablo

12 ¹Goãmũ marire turaro mojomoro ãhami. ãgũ eropã mojomoro ãgũ árĩcũ ãarã, yũ acawererã, mũa basi ta Goãmũ gamerire iinigicãrã árĩque. “Mũhũ yũ opũ áhrra,” arĩque ãgũre. Eropirã ðaripũre gohrotonirã, ñeri marirã árĩque. Eropã ta iiro gahmea marire Goãmũre umupeorãre. Mũa eropã árĩrã árĩcũ ãgũ mucubirigũcumi. Eropigũ mũare irire bũrigã iidorea. ²I yeba majarã erã gamero dopa ta pepibiricãque mũa. Eropirã mũa pepiriguere Goãmũ gamerire gohrotoque mũa. Eropirã ðaripũre gohrotonirã árĩrãca mũa. Eropã gohrotorã Goãmũ mũare ãgũ iidorerire masirãca mũa.

³Goãmũ yũre mojomoro ãgũ mũare buhedoregũ beyemi yũre. Eropigũ árĩpehrerãre mũare ðpã dorea yũhũ. “Õatariagũ áhrra yũhũ,” arí pepibiricãque. Eropã pepicãque. Jesucristore mũa umupeorã “Goãmũ yũre ãgũ itamuro mera iimasia yũhũ ãgũ yare,” arí pepique. ⁴Õpã arí werenemogũra yũhũ: Mari mojotori, guburi, cuiuri, árĩpehreri mari dũpũ árĩri baja áhrra. Mari dũpũ árĩri sã yuju dũpũ árĩquerero gajiropã árĩri mohmeri opaa. Mari dũpũ mari Jesu yarã iro dopa áhrra. Cristo dũpũ iro dopa árĩrã yuju curu ta áhrra mari. ⁵Mari eropã árĩcũ ãgũ gajiropã árĩri dihta mohmerire apimi Goãmũ marire. Eropirã bajarã masa árĩquererã ta Cristore umupeorã árĩrã ãgũ dũpũ iro dopa yuju curu áhrra mari.

⁶Eropigũ marire mari nũcũre gajiropã árĩri mohmerire mari iimasiburire ãgũ turari mera apidigũ árĩmi. ãgũ eropiicũ maripũ ãgũ apirare ðaro iiro gahmea. Eropirã Jesu yarã ðpã game itamuporo: Yujurãyerire Goãmũ ãgũ yare weretaumasimorãre apidi árĩmi. Eropirã erã Cristore erã masiopẽ ãgũ yare ðaro weretauporo gajirãre. ⁷Gajirãre Goãmũ yarãre erã itamumasimorãre apidi árĩmi. Eropirã erãpũ masare ðaro mera itamuporo. Gajirãpũre Goãmũ yare buhemorãre apidi árĩmi. Eropirã erã masare ðaro buheporo. ⁸Gajirãre masare mucubiricũ iimorãre apidi árĩmi. Eropirã irire ðaro iiporo. Gajirãre erã ya erã gamerire omorãre apidi árĩmi. Eropirã gajinore orã, ðaro mera mucubiriri mera oporo. Eropirã gajirãre doremãsimorãre apimi. Erã dorerã ðaro mera doreporo. Eropigũ daja mojomorocũrãre itamumasimorãre apidi árĩmi. Erãre itamurã mucubiriri mera itamuporo, arí werea mũare.

Jesu yarã árĩrã ðpã iirã áhrrima, arí gojañumi Pablo

⁹Gajirãre mahi umupeorã, diaye ta mahi umupeoque. Eropirã ñero iirire doorã árĩque mũa. Eropirã ðaripũre gamenigicãque. ¹⁰Mũa pagũ porãre mũa umupeoro dopa ta Jesu yarã mũa mera majarã sãre umupeoque. Eropirã mũa mera majarã erã gameripũre itamumãhtaque. Pũhũ mũ yare iique.

¹¹Goãmũ gamerire iirã ne tebircãque. Eropirã mari Opũ ãgũ dorediro dopa ta ðaro mucubiriri mera iique.

¹²Goãmũ mũare peamegue wabonirãre ãgu taunirã ãhraa mũa. Irirẽ masirã mucubirique mũa. Eropirã ñero tarirã Cristo yare duhuro mariro yujuro bojeque mũa. Eropirã Goãmũre eropa serẽnguicãque.

¹³Gajino Jesu yarãre duhyacũ ãarã oque erãre. Eropirã mũa ya wirigue masa erã ejacũ ãaro siporãcũ erãre bocatirique.

¹⁴Mũare ñero iirãpũre erã ãaro árĩburire serẽque Goãmũre. Eropa ãadorerã erãre ujapeobiricãque.

¹⁵Gajirã mucubiricũ ãha erã mera mũa sã mucubirique. Gajirã orecũ ãha erã mera oreque.

¹⁶Mũa mera majarã mera ãaro árĩque mũa. Eropirã “Gajirã tauro ãagu ãhraa,” arĩ pepibiricãque. Bu árĩrã mera sãre ãaro árĩque. Eropirã “Masitarinũgarã ãhraa gũa,” arĩ pepibiricãque.

¹⁷Gajirã mũare ñero iiquerecũ ta, erãre ñero ii gamebiricãque. Eropirã ãarire iique. Eropirã ãarã mũa árĩrĩre árĩpehrerã masa ãha masirãcoma. ¹⁸Mũa masiropẽ turaro mera ãarire iique árĩpehrerã mera mũa ãaro árĩcãboro dopa. ¹⁹Mũa yũ mahirã, yũ acawererã, gajirã mũare erã ñero iiquerecũ ta erã iro dopa ñero ii gamebiricãque. “Erã ñero iira dipuwaja Goãmũpũ dipuwaja moagũcumi,” arĩ guñarã ñero ii gamebiricãque erãre. Goãmũ yare erã gojarapũgue eropa ta arĩ gojañuma: “Yũpũ masa erã ñero iira dipuwaja moagũ ãhraa. Eropigu ãiaye ta dipuwaja moagura, arĩmi mari Opũ,” arĩ gojara ãhraa. ²⁰Eropirã ãpa iique mũa: Mũare ãhaturidigu ãgu oaboacũ ãarã ejoque ãgure. ãgu ñemesibucũ deco ãiaque ãgure. Eropa iirã mũare ãhaturidigu ãgu ñero iirare guhyasĩricũ iirãca. ²¹Eropirã gajirã mũare erã ñero iiquerecũ mũapũ erãre ñero ii gamebiricãque. Eropirã erãre ãaro iique. Eropa iirã ñeripũre tarinũgarã iirãca mũa.

13 ¹Árĩpehrerã oparãre Goãmũ dihta apimi. Eropigu mũa tauro oparã sãre Goãmũ ta beye apidigu árĩmi. ãgu eropa apinirã erã árĩcũ ãarã árĩpehrerã mũa erãre yũhrique. ²Mari tauro oparã árĩrãre tarinũgarã Goãmũ ãgu apinirãre tarinũgarã iirãca mari. Eropa tarinũganirãre Goãmũpũ dipuwaja moagũcumi. ³Õarire iirãre guicũ iimorã árĩbeama oparã. Ñerire iirãpũre guicũ iirã ãhrima oparã. Eropirã ãarire iique mũa oparãre mũa guibiriburire. Eropa iirã guisome mũa. Õarire mũa iicũ, opũpũ “Õarire iiabũ,” arĩgũcumi mũare. ⁴Oparã Goãmũre itamurã ta ãhrima mũa ãaro árĩcãborore. Erã eropa árĩquererã ta erã dorerire tarinũgarãpũre dipuwaja moamorã ta ãhrima. Árĩpehrerã ñerire iinirãre dipuwaja moadoregu Goãmũ erãre apidi árĩmi. ⁵Eropirã mari oparãre yũhrique. Goãmũ ãgu dipuwaja moaborore guiro mera yũhrique. Eropirã umupeori mera “Õaro iiro gameca yũre,” arĩ pepiri mera ãaro yũhrique erãre. ⁶Mũa oparãre iri mohmerire apidi árĩmi Goãmũ. Eropirã iri mohmerire erã iicũ ãarã mũa oparã ya árĩburire wajaseabasaa mũa erãre.

⁷Árĩpehrerãre mũa oparãre ãaro yũhrique. Eropirã oparã erã wajaseadorerare wajayeque mũa. Eropirã oparã gajire wajayedorecũ sãre wajayeque. Eropirã árĩpehrerã oparãre umupeoque, arãa yũhũ mũare.

⁸ Gajiräre wajamobiricäque. Eräre mahi umupeoro gahmea. Īḡu pohro áriḡure mahiḡu Goāmũ dorerire iipehocāḡu áhrimi. Eropirā mũa pohro áriřā säre mahiro gahmea. ⁹ Ōpa arāa Goāmũ doreri: “Gajigũ marapo mera ñero iirā áribiricäque. Masare wejëbiricäque. Yajabiricäque. Gajiräre ḡyaa ñeri quere iibiricäque. Gajirā yare turaro uaribejabicäque,” arī werea ĩḡu doreri. Gaji ĩḡu doreri sã áhraa. Iri eropa áriquerecũ ta yujuñe doreriñere mũare werebu iiaa. Ōpa áhraa: “Mũ basi mahiro dopa ta mũ pohro áriřäre mahique,” arī werea ĩḡu doreri. Mũa pohro áriřäre mahirā Goāmũ dorerire áriḡehrerire yũhrirā tiiaa. ¹⁰ Gajiräre mahirā eräre ñero iisome. Eropirā eräre mahi umupeorā Goāmũ dorerire yũhripehorā áhraa mũa.

¹¹ Eropā gajiräre mahique ōpa masirā: Jesu marire ĩḡu dujariboro merogā duhyaniḡaa. Īḡure mari ne masinũgarā ōpa arī pepiribũ. “Yoara pũhrũḡue marire taugũ arigũcumi Jesu,” arī pepiribũ. Mari eropa arī pepiquerecũ ta merogā duhyaa Jesu marire ĩḡu taugũ ariboro. Eropirā carirā iro dopa áribiricäque. Īḡu yare ōaro ḡuñanũḡuque. Jesu ariboro corere ōaro pee masi yuque. ¹² Dohpaguere ñerā erā iirinũri áriřo iiaa. Cristo ĩḡu aririnũ iri ñeri pehreroca. Īḡu ariboro merogā duhyaa. Īḡu ariboro merogā duhyacũ ĩarā ñerire iibiricārā mari. Eropirā Goāmũ gameripũre iirā mari. Eropā Goāmũ yare iirā ñeripũre duhcārāca mari. ¹³ Eropirā ōaripũre iirā. Eropā iirā bosenũri áricũ mari uaribejarire ñeri iibirabicārā. Eropirā merebiricārā. Eropirā nome mera ñero iibiricārā. Gajirā mera game ĩhaturirā áribiricārā. Nome sã uma mera ñero iibiricāporo. ¹⁴ Eropirā mari Opũ Jesucristo ĩḡu itamuri mera ĩḡu gamero dopa ta ōaro áricäque. Eropirā mũa uaribejarire ñerire ne iibiricäque.

Mũa acawereräre Jesu yaräre “Ñero iirā iima,” arī werewuabiricäque, arī gojañumi Pablo

14 ¹ Jesure umupeogũre, Jesu gamerire ĩḡu ōaro masinibiricũ dohpa, ĩḡure ōaro bocatĩrique. Eropā bocatĩrirā Jesu gamerire ĩḡu masinibiricũ ĩarā ĩḡu masibiririre duyasobiricäque ĩḡure. ²⁻³ Gajirā “Goāmũ áriḡehrerire badoremi marire,” arī pepima. Eropirā gajirāpũ ōaro masinibirā “Waibũḡu dihipũre bacũ Goāmũ gamebeamĩ,” arī pepima. Eropirā oteri dihtare bahama. “Dihire bamasia,” arĩrā, “Dihire bamasibea,” arĩrā sã erā Jesucristore umupeorā áricũ ĩha Goāmũ ōarā ĩhami eräre. Eropirā “Áriḡehrerire Goāmũ badoremi,” arĩrāpũ “Iri dihire bamasibea,” arĩräre ĩhaturibiricāporo. Eropirā dihire babirāpũ dihire baräre “Ñero iirā iima,” arī werewuabiricāporo. ⁴ Mũa Jesure umupeorā yujuḡu dorero doca áhraa mũa. Mũa eropa áricũ ĩarā mũa basi game werewuamasibea. Jesucristo mũa Opũ ĩḡu gamerire mũa iibiricũ ĩaḡu ĩḡu dihta irire weresāmasimi. Mũa ōaro iicũ säre irire ĩḡu weremasimi mũare. Eropigũ ĩḡu dorerire iiräre ōarire bocatiũcũ iigũcumi mari Opũ.

⁵ Yuḡurāyeri yujunũre “Irinũ dihta soorinũ gamenere Goāmũre umupeorinũ áhraa,” arī pepima. Gajirāpũ “Uũmũri nũcu gamenere Goāmũre umupeoro gahmea,” arī pepima. Eropigũ ōpa werea mũare yũhũ: Mũa nũcu

mua pepirire “¿Dinũ áhriri mari gamenere umupeorinũ? ¿Dinũ árĩbeari?” arĩ pepĩ masique mua. ⁶Gajigũ yujunũ iimi ĩgũ Goãmũre umupeoburinũre. Eropigũ umũri nũcu gamenere umupeobiriqueregũ, Goãmũre õaro umupeomi ĩgũ sã. Eropigũ árĩpehrerire bagũ sã “Õhaa,” arĩ serẽmi Goãmũre. Eropigũ ĩgũ sã Goãmũre umupeogu ta áhrimi. Eropigũ gajinore babi sã ĩgũ sã umupeomi Goãmũre. Eropigũ ĩgũ sã Goãmũre “Õhaa,” arĩ serẽmi.

⁷Mari gameri dihtare iirã árĩmasibea mari. Cristo áhrimi mari Opũ. Eropigũ mari ojocaricũ, mari sĩricũ mari Opũ áhrimi ĩgũ. ⁸Dohpaguere mari ojocaripõ Cristo yare iimorã dihta áhraa mari. ĩgũ yarã áhraa. Mari sĩrira pũhrũgue sãre ĩgũ yarã árĩniguicãrãca. Eropigũ mari ojocaricũ mari sĩricũ sãre Cristo mari Opũ ta áhrimi. ⁹Eropa ta áhraa. Cristo sĩri, masa mũria, ojocarimi sĩrinirã sãre erã opũ árĩbu.

¹⁰¿Duhpirã mua acaweregũre Jesu yagũre “Ñero iigu iimi,” arĩ werewuadiari mua? ¿Duhpimorã mua acaweregũre curadiupidiari mua? Mari árĩpehrerã Cristo core mari niguicũ ĩgũpũ mari iirare masipehogũ, mari iirare ĩagũcumi. ĩgũ eropa ĩabu ĩgũ árĩcũ mua acaweregũre “Ñerire iigu áhrimi,” arĩ werewuabiricãque. ¹¹Goãmũ yare erã gojarapũgue õpa arĩ gojañuma:

Õpa arĩmi mari Opũ: “Yũhũ ojocarigũ áhraa. Iri diaye ta áhraa. Eropirã árĩpehrerã yure gamerã, gamebirã sã yũ core merejarãcoma. Eropirã árĩpehrerã ‘Mũhũ turagũ gua Goãmũ ta áhraa,’ arĩ, yure umupeorãcoma,” arĩmi mari Opũ, arĩ gojañuma.

¹²Eropigũ mari árĩpehreri mari iirare Goãmũ serẽpigũcumi. ¿Duhpirã eropa iiari? arĩ serẽpigũcumi. ĩgũ eropa serẽpicũ yũhrirãca mari.

Mua acaweregũ ñero dujacũ iibiricãque mua, arĩ gojañumi Pablo

¹³Eropirã mari mera majarã sãre “Ñerã áhrima,” arĩ werewuabiricãrã. Eropirã mari acaweregũre Jesu yagũre ñero dujacũ iibiricãrã. ĩgũ Goãmũ yare duhucũ iibiricãrã. ¹⁴Yũhũ Jesucristo yagũ áhraa. Eropigũ õpa õaro masia yũhũ: “Árĩpehreri Goãmũ ĩgũ badorera áhraa,” arĩ masia. Gajigũpũ eropa arĩmasibeami. ĩgũpũ gajinore bagũ “Ñero iigu iiaa,” arĩ pepimi. Eropiro ĩgũ irire arĩ pepiqueregũ bagũ diaye ta dipuwajacũgũ dujami. ¹⁵Iri diaye ta áhraa. Mua dihire mua bacũ mua acaweregũ “Iri Goãmũ badorebirira áhraa,” arĩgũpũ ĩhacũbocumi muare. Eropigũ irire bagũ, “Ñero iigu iica yũhũ,” arĩ wũaro guñaricũbocumi ĩgũ. Eropirã mua bari mera ĩgũ ñero pepicũ ĩha irire dipaturi babiricãro gahmea muare. Mũhũ mũraro ta bagũ mũ acaweregũre umupeosome. Mua acaweregũ yañe árĩborañe sãre sĩridi arĩmi Jesucristo. Eropirã mua irire badiaquererã mua acaweregũre Goãmũ yare duhucũ iibiricãque. Eropirã irire babiricãque. ¹⁶“Ire gua eropa iicũ õapũricãca,” mua arĩ pepiquerecũ gajirã muare ĩha werewuabocoma. Erã eropa werewuacũ ĩarã dipaturi irire iinemobiricãque guare werewuari arĩrã. ¹⁷Goãmũpũ mari opũ áhrimi. ĩgũ eropa árĩcũ, mari badiari mari ihridiari sã eropa árĩcãro iiaa. Bu gohra áhraa. Eropiro mari Opũ ĩgũ dorerire õarire mari iicũ iri õari gohra árĩro tiaa. Eropiro gajirã mera mari õaro árĩcãcũ õari gohra árĩro iiaa. Eropiro Espĩritu

Santo ïgu itamuri mera mari mucubiricũ òari gohra áriro iiaa. ¹⁸Eropa ta Cristo yare òarire iicũ ïarã Goãmũ sã, masa sã “Òaro iabũ muhũ,” arĩrãcoma.

¹⁹Eropa ta iirã mari tamera mari òaro áricãborore, mari basi mari game itamuburire. Eropa iiricurã Jesure umupeonemorãca. ²⁰Eropirã mua bari mera Jesu yarãre Goãmũ yare duhucũ iibiricãque. Gajigũ Jesu yagũ “Goãmũ badorebirira bari àhraa,” ïgu arĩra barire mua bacũ ïagu ïgũpũ Goãmũ yare duhubocumi. Eropirã irire babiricãque. Diaye ta áripehreri bari Goãmũ ïgu badorera bari àhraa. Iri eropa áriquerecũ gajigũ “Iri barire Goãmũ badorebeamĩ,” arĩ pepimi. Eropigũ mua iri barire bacũ ïagu ïgũpũ ïhacũ babocumi ïgu sã. Eropa bagũ “Ñero iigũ iiaa,” arĩ pepi Goãmũ yare duhubocumi. Eropirã marire ïgu ïhacũ bacũ iirã mari sã ñero iirã tiiaa. Eropirã iri barire babiricãro gahmea marire. ²¹Waimurã dihire mua bacũ vinore mua ihricũ ïagu, gajigũ Jesu yagũ ïabocumi. Eropa ïagu ïhacũ babocumi daja. “Irire bagũ ñero iigũ iica yũhũ,” arĩ pepibocumi. Eropa arĩ pepigũ tamera bagũ ñero iigũ iimi. Eropirã ïgu ñero ïgu iibiriborore waimurã dihire, vino sãre mũarũ ba duhucũ òacãroca. Jesure ïgu umupeo duhubiriborore iibiricãro gahmea marire. ²²Eropirã mua baburire, ihriburire game dũyasobiricãque. “Áripehreri barire Goãmũ marire badoredigũ árimi,” arĩ pepirã irire Goãmũ dihtare wereque. “Ñerire iibigũ, òaro iigũ iica,” ïgu pepirigue arĩ masigũ mucubirigũ àhrimi. ²³Gajigũpũ iri barire bagũ, “Ñero iigũ iiboca yũhũ,” arĩ pepigũ áriqueregũ iri barire bagũ, dipuwajacũgũ àhrimi ïgu. ïgu ta “Ire bagũ diaye ta òarire iigũ iiaa,” ïgu pepirigue arĩmasibeami. Eropa arĩmasibigũ irire bagũ, ïgu bara waja dipuwajacũmi ïgu. “Òarire iigũ iiaa,” arĩmasibirinjagũ irire iigũ dipuwajacũgũ àhrimi.

Mari pohro árirãre òaro umupeorã, arĩ gojañumi Pablo

15 ¹Eropirã Jesucristore òaro mari umupeorãpũ, òaro umupeoturabirãre itamuro gahmea. Eropirã mari ya áriburi dihtare iibiricãro gahmea. ²Mari pohro árirãre erã gamero dopa ta iiro gahmea erã òaro áricãborore. Goãmũre erã òaro guñaturanemoburire iiro gahmea. ³Jesucristo sã ïgu ya dihtare iibiridi árimi. Eropa ta arãa Goãmũ yare erã gojarapũ. Òpa arĩ gojañuma: “Cristo òpa arĩmi Goãmũre: ‘Mũpũre ñero wereniguibonirã yũpũre ñero wereniguima,’ arĩmi Cristo Goãmũre,” arĩ gojañuma iribojeguerẽ. ⁴Iribojegue erã Goãmũ yare gojañuma mari òaro buheborore. Eropirã iri erã gojarapũre buherã siporã turarã wahaa mari. Eropa buherã ñero tarirã yujuro bojerãca. ⁵Goãmũ mũare turacũ iigũ siporã turacũ iigũ mũare game òaro áricãcũ iiporo Jesucristo ïgu gamediro dopa ta. ⁶Eropa ta iiporo ïgu mua áripehrerã yujuro mera Goãmũre umupeoborore, mari Opũ Jesu Pagũre “Òagu àhrimi. Turagu àhrimi,” mua arĩborore.

Judio masa áribirãre òari buherire werenũgama, arĩ gojañumi Pablo

⁷Cristo ïgu mũare iidiro dopa ta mua mera majarãre òaro game bocatĩrique. Mũa eropiiicũ ïarã “Diaye ta Goãmũre òagu masa yujuro mera òaro áricãcũ itamugũ àhrimi,” arĩ ïarãcoma masa. ⁸Mũare ire

arĩgu iiaa: Ĩgu Pagu ĩgu arĩ werediro dopa diaye ta iigu ĩgu árĩcũ ĩhmugu, judio masare itamubu aridigu árĩmi Cristo i yebaguere. Eropigu Goãmu Abrahã sãre arĩ werepidiro dopa ta iigu aridigu árĩmi. ⁹Masare Cristo ĩgu itamucũ ĩgu Pagu Goãmu mojomoro ĩagu iidigu árĩmi erãre. Ĩgu eropa mojomoro ĩacũ ĩarã judio masa árĩbirã sã Goãmure “Ōagu àhrimi. Turagu àhrimi,” arĩ umupeoma dohpaguere. Erã sãre ĩgu yarã árĩcũ iigu aridigu árĩmi Cristo. Goãmu yare erã gojarapũgue eropa ta arĩ gojañuma:

Cristo õpa arĩmi ĩgu Pagure: Judio masa árĩbirã watope mure umupeogura.

“Goãmu õagu àhrimi,” arĩgura. Eropigu erã watope bayagu mu ya árĩburire bayagura, arĩmi Cristo ĩgu Pagure, arĩ gojañuma iribojeguerẽ.

¹⁰Eropirã õpa arĩ gojañuma daja:

Goãmu ĩgu beyenirã mera judio masa mera game mucubirique mua sã judio masa árĩbirã, arĩ gojañuma iribojeguerẽ.

¹¹Eropirã õpa arĩ gojañuma daja:

Judio masa árĩbirã árĩpehrerã Goãmure umupeoporo. Eropirã árĩpehrero majarã ĩgure “Ōagu àhrimi. Turagu àhrimi,” arĩ umupeoporo, arĩ gojañuma.

¹²Eropigu Isaia muru sã õpa arĩ gojañumi:

Davi pagu Isai muru pãrami árĩturiagu arigucumi. Eropa arigu judio masa árĩbirã tauro opu árĩgucumi ĩgu. Eropirã erãpu ĩgure umupeorã erãre peamegue wabonirãre ĩgu tauborore masirãcoma, arĩ gojajuñumi iribojeguerẽ.

¹³Goãmu marire taugu árĩbu õaro mure mucubiricũ iiporo. Eropigu Jesure mua guñaturacũ mure õaro árĩcãcũ iiporo ĩgu. Mure ĩgu eropicũ “Ĩgu pohro mari warãca,” arĩ mucubiri masinemorãca mua Espĩritu Santo ĩgu turari mera, arãa yũhu mure.

¹⁴Yu acawererã, õaro mera mure guña. Mua õarã àhraa. Eropirã Jesu yare õaro masia. Eropa masirã mua mera majarãre game õaro were, buhemasia.

¹⁵Mua eropa masirã mua árĩquerecũ ta ipũguere mure guĩiro mariro irire õaro werepehobu yũhu erãgue cãdijiri arĩgu. Goãmu yure mahigu mure buhedoregu apimi yure. Eropigu ĩgu apidiro dopa ta mure guñacũ iigu iiaa.

¹⁶Yure ĩgu apicũ Jesucristo yare õari buherire judio masa árĩbirãre buhea yũhu. Eropa buhecũ peerã judio masa árĩbirã Jesure umupeorãcoma. Erã eropa umupeocũ ĩagu Goãmu erãre “Ōarã àhrima,” arĩ ĩagucumi. Eropigu erãre gamegucumi. Eropigu Espĩritu Santopu Goãmu yarã wacũ iigucumi erãre.

¹⁷Eropigu Jesucristore umupeogu arĩgu Goãmu yure buhedore apirare mucubiriri mera werea masare. ¹⁸⁻¹⁹Judio masa árĩbirãre Cristo itamuri mera erãre yũ buhecũ peerã, Cristore umupeoma. Eropirã masa árĩbirãre buhea yũhu. Eropa buhecũ peerã judio masa árĩbirã Jesure umupeorãco yũ õaro iiricurire ĩarã, Goãmu turari mera yũ deyoro moarare ĩarã, Espĩritu Santo ĩgu turari mera erã Cristore umupeoma. I árĩpehrerire mure diaye werediaca. Gajirã erã iirare werebea. Jerusalẽgue ne yũ buhenugara puhru árĩpehreri

macarigue buhe curibũ. Yoarogue, Iliria yebague sãre Jesucristo ya buherire õari buherire buhegũ ejabũ. ²⁰Eropigu Cristo yare masibirã dihtare õari buherire turaro buhediabũ. Yũ mera majarã erã buhenirãguere buhediabiribũ. ²¹Eropa arĩ gojañuma Goãmũ yare erã gojarapũguere. Õpa arĩ gojañuma: Iribojegue ãgũre ne masibirinirã ãgũre masirãcoma. Eropirã ãgũre ne peebirinirã ãgũ yare õaro peerãcoma, arĩ gojañuma Goãmũ yare erã gojarapũgue.

Pablo Romague ãgũ waborore wereñumi

²²Eropigu áriphebrero majarãre buhegũ árigũ bajasuburi mũa pohro wadiaqueregũ ta wamasibirimurabũ. ²³Dohpaguere i yebaguere a áribirã Jesure umupeorãcoyũ mohmeri pehrea wahaa. Eropa pehrecũ ãgũ baja bojori mũa pohro wadianiguigũ árigũ, mũa pohrogue wagũra. ²⁴Eropigu Españague wagũ mũaere ero ãhatari wahgãgũra. Eropigu mũa mera mucubirigũra. Eropigu mũa mera áridigũ wagũ mũa yũre itamuri mera wagũra daja. ²⁵Dohpaguere Jerusalengue wanibu iiaa. Ero majarãre yũ acawererãre Jesu yarãre niyeru sonigũ wagũ iiaa. ²⁶Macedonia majarã, Acaya majarã, õaro mera Jesu yarã Jerusalengue áripãre mojomorocũrãre niyerure obooama erãre itamurã. Eropigu erãre oboorare sogũ wagũ iiaa. ²⁷Iri niyerure orã õaro mera ohãma. Erã eropiicũ õapũrica yũ pepicũ. Erãre judio masa áribirãre, gũa judio masapũ Goãmũ yare buhemũhtabũ. Eropirã erãre ãgũ tauboro sãre buhemũhtabũ gũa judio masa erãre. Gũa eropa buhecũ ãgũ, Macedonia majarã, Acaya majarã mera judio masapũre Jerusalén majarãre itamucũ õapũrica yũre. Erãre erã buhera waja áhrra iri niyeru yũ pepicũ. ²⁸Eropigu Jerusalén majarãre iri niyerure yũ ora pũhrũ Españague wagũca. Eroque wagũ mũaere ãhatari wahgãgũra. ²⁹Eropigu mũa pohrogue yũ wacũ Cristo yare yũ mũaere buhecũ Cristo marire õaro siporãcũcũ iigũcumĩ.

³⁰Mũa, yũ acawererã, mari Opũre Jesucristore umupeoa. Eropirã Espĩritu Santo ãgũ turari mera gajirãre umupeoca mũa. Mũa eropiirã áripã yũ sãre turaro serẽbasaque Goãmũre. ³¹Õpa arĩ serẽbasaque: Judea yeba majarã Jesure umupeobirã yũre erã ñero iidiacũ Goãmũ yũre itamuboro dopa serẽque. Eropirã Jerusalén majarãre iri niyerure yũ ocũ erã irire mucubiriri mera erã ñeaboro dopa serẽque. ³²Mũa eropa serẽcũ Goãmũ gamecũ mucubiriri mera mũa pohrogue wagũca. Eropigu mũa mera árigũ mucubiriri mera soogũra. ³³Goãmũ marire õaro áricãgũ ãgũ mũa mera áriporo. Eropa ta iporo.

Pablo õadoreñumi

16 ¹Mari acawerego Febe waĩcũgo mũa pohrogue wabo iimo. Igo Cencrea waĩcũri macague Jesu yarãre itamugo áhrimo. ²Eropigo bajarãre yũ sãre itamugo áhrimo igo. Eropirã mũa igo mera yujuro mera mari Opũre umupeorã áhrra. Eropirã igore õaro mera bocatĩrique. Eropa ta iiro gahmea marire Jesu yarãre. Eropirã igore igo gamerire gajino dũhyacũ igore oque mũa.

³Aquila, ĩġu marapo sã Priscila sã õaporo. Jesucristo yare yu buhecũ erã sã yu mera mohmeama. ⁴Erãre mero wejẽbocurima gajirã erã yure wejẽdiacũ itamuri waja. Eropigu erã mera mucubiria yuhũ. Eropirã judio masa áribirã Jesu yarã áripehrerã erã sã erã mera mucubirima. ⁵Eropirã Aquila ya wihi gamenererã sã Jesu yarã õaporo. Yu mahigu Epenéta sã õaporo. ĩġu Asia majagu ero áriġu Cristore umupeomũtadigu árimi. ⁶María sã õaporo. Igo mua mera turaro mohmeapo. ⁷Yu acawererã Andrónico, Junia sã õaporo. Peresu yu áricũ erã ta yure wapicunirã áhrama. Eropirã yu core Cristore umupeomũgañorã erãpũ. Gajirã Jesu ĩġu apinirãpũ erãre “Diaye ta õarã áhrima,” arĩ wereniguima.

⁸Amplia sã yu mahigu Jesu yagu áhrimi. ĩġu õaporo. ⁹Eropigu Urbano sã õaporo. ĩġu sã mari mera Cristo ya áriburire mohmeami. Eropigu yu mahigu mera majagu Estaqui õaporo. ¹⁰Eropigu Apele sã õaporo. ĩġu diaye ta õaro Jesucristore umupeomi. ĩġu iiricurire ĩarã ĩrire masia mari. Eropirã Aristóbulo ya wihi majarã áripehrerã ĩġu marapo ĩġu porã sã õaporo. ¹¹Yu acaweregu Herodión õaporo. Eropirã Narciso ya wihi majarã Jesu yarã õapehrecãporo. ¹²Eropirã Trifena, Trifosa sã õaporo. Erã nome mari Opũ Jesu mohmerire iima. Mari mahigo Pérsida sã õaporo. Igo mari Opũ Jesucristo yare turaro mohmemo. ¹³Eropigu Rufo mari Opũ Jesure õaro umupeogu, ĩġu yare õaro iigu õaporo. ĩġu pago sã õaporo. Igo yu pago iro dopa ta áriġo áhrimo. ¹⁴Asíncrito, Flegonte, Herma, Patroba, Herme, gajirã Jesu yarã erã mera majarã sã õaporo. ¹⁵Eropirã Filólogo, Julia, Nereo, ĩġu pagu mago sã Olimpa, gajirã erã mera majarã sã Jesu yarã õaporo.

¹⁶Eropirã mua mera majarãre bocatĩrirã mucubiriri mera mojoto ñeaque. Áripehrerã Jesu yarã áripehrero majarã mũare õadorema.

¹⁷Yu acawererã, mua mera yujurãyeri mũare game ĩhaturicũ iirã game ñuca waricũ iirã áricoma. Eropirã mũare Jesu ya buherire goroweoma. Eropirã eropa iirãre õaro iique goroweori arĩrã. Eropa árirãre wapicubiricãque.

¹⁸Eropa iirã mari Opũ Jesucristo yare iibeama. Ñerire erã uaribejari dihtare iima. Eropirã õaro wereniguirã iro dopa guyama masibirãre erã. Erã eropa guyacũ erãre õaro peenũrũma. Eropirã erãre wapicubiricãque mua. ¹⁹Mũarũ Jesure õaro yũhrirã áhraa. ĩrire áripehrerã masima. Eropa õaro mua yũhrirã mũa áricũ pee mucubiria yuhũ. Eropigu õaro mua iiborore masicũ gahmea yuhũ. Eropigu ne ñeri sãre mua iibiricũ gahmea yuhũ. ²⁰Eropigu Goãmũ marire õaro áricãcũ iigu merogã pũhrũ watĩre tarinũgagu iibasagũcumi mũare. Mari Opũ Jesucristo õaro mũare itamuniguicãporo.

²¹Timoteo yu mera majagu mũare õadoremi. Yu acawererã Lucio, Jasõ, Sosĩpate mũare õadorema.

²²Yũhũ Tercio ipũre gojabasagu áhraa Pablore. Yũhũ Jesu yagu áriġu mũa Jesu yarãre õadorea.

²³Gayo ya wihi áricãgu iiaa yuhũ Pablo. ĩġu ya wihigue Jesu yarã gamenerema Goãmũre umupeomorã. ĩġu sã mũare õadoremi. Eropigu Erasto i maca majarã oparãre ñiyeru dibubasagu mũare õadoremi. Mari acaweregu Jesu yagu Cuarto sã mũare õadoremi.

24Mari Opu Jesucristopu mware arıpehreräre öaro iiporo. Eropa ta iiporo.

Pablo Goãmure umupeori mera gojatuñumi

25-27Mari Opu Jesucristo ya buheri mera öari buheri mera Goãmü mware igure guñaturanemocü iimasimi. Iribojegue iri öari buheri ne masa masibiriri buheri arıriyoro. Dohpaguere Goãmü yare weremũhtanirã erã gojara mera iri buherire masidoregü iimi. Yu sã irire buhea. Iri buherire arıpehrero majarã dohpaguere masima. Goãmü eropa arıninguicãgü dorero dopa ta erã masima. Iri buherire igü ta weredorepu masa igure erã yuhriborore, igure erã umupeoboro sãre. Eropirã igure “Diaye ta öagü, turagü ahrimi,” arı umupeorã. Igü yujugü ta Goãmü öaro masipehogü ahrimi. Jesucristo igü itamuri mera Goãmure eropa umupeoniguicãrã mari. Eropa ta iirã. Iripëta ahraa.